



**UNIVERSITETI BUJQËSOR I TIRANËS  
SENATI AKADEMIK**

*Pr. 1204/3 Prot  
Dt. 18.04.2024.*

**KRYETAR I SENATIT AKADEMIK**

**Prof.Dr. Fatbardh SALLAKU**



**RREGULLORE**

**“PËR  
ORGANIZIMIN E ZGJEDHJEVE PËR AUTORITETET DHE ORGANET  
DREJTUESE NË UBT”**

**(Miratuar me Vendimin Nr. 07, datë 18.04.2024 të Senatit Akademik të UBT-së)**

## Përmbajtja

<b>KREU I.....</b>	<b>4</b>
<b>DISPOZITA TË PËRGJITHSHME.....</b>	<b>4</b>
NENI 1.....	4
OBJEKTI I RREGULLORES.....	4
NENI 2.....	4
BAZA LIGJORE.....	4
NENI 3.....	5
SUBJEKTI/ET E RREGULLORES.....	5
NENI 4.....	5
PARIMET E PËRGJITHSHME.....	5
NENI 5.....	7
PERIUDHA ZGJEDHORE DHE THIRRJA E ZGJEDHJEVE.....	7
<b>KREU II.....</b>	<b>8</b>
<b>INSTITUCIONET PËR PËRGATITJEN DHE ADMINISTRIMIN E ZGJEDHJEVE.....</b>	<b>8</b>
<b>PËR AUTORITETET DREJTUESE DHE SENATIN AKADEMIK NË UNIVERSITETIN BUJQËSOR TË TIRANËS.....</b>	<b>8</b>
NENI 6.....	8
KOMISIONI INSTITUCIONAL I ZGJEDHJEVE (KIZ).....	8
NENI 7.....	10
KOMISIONET E ZGJEDHJEVE NË FAKULTETE.....	10
NENI 8.....	12
QENDRAT E VOTIMIT.....	12
NENI 9.....	12
KOMISIONI I QENDRËS SË VOTIMIT (KQV).....	12
NENI 10.....	12
TË DREJTAT DHE DETYRAT E VËZHGESVE.....	12
<b>KREU III.....</b>	<b>13</b>
<b>ZGJEDHËSIT DHE LISTA E ZGJEDHËSVE.....</b>	<b>13</b>
NENI 11.....	13
ZGJEDHËSIT DHE PËRGATITJA E LISTËS SË ZGJEDHËSVE.....	13
NENI 12.....	15
TRUPA ZGJEDHORË PËR ANËTARËT E PERSONELIT AKADEMIK TË SENATIT AKADEMIK.....	15
NENI 13.....	15
TRUPA ZGJEDHORË PËR ANËTARËT STUDENTË TË SENATIT AKADEMIK.....	15
NENI 14.....	16
TRUPA ZGJEDHORË PËR REKTORIN.....	16
NENI 15.....	16
TRUPA ZGJEDHORE PËR DREJTUESIN E NJËSISË KRYESORË.....	16
NENI 16.....	16
TRUPA ZGJEDHORE PËR DREJTUESIN E NJËSISË BAZË.....	16
NENI 17.....	16
TRUPA ZGJEDHORË PËR ANËTARËT E KOMISIONEVE TË PËRHERSHME TË NJËSIVE KRYESORE.....	16
<b>KREU IV.....</b>	<b>17</b>
<b>REGJISTRIMI I KANDIDATËVE DHE FUSHATA ZGJEDHORE.....</b>	<b>17</b>
NENI 18.....	17
REGJISTRIMI KANDIDATËVE.....	17
NENI 19.....	17
KRITERET PËR ANËTARËT E SENATIT AKADEMIK.....	17
NENI 20.....	18
KRITERET PËR REKTOR TË UBT.....	18
NENI 21.....	19





KRITERET PËR DREJTUES TË NJËSISË KRYESORE NË UBT .....	19
NENI 22.....	20
KRITERET PËR DREJTUES TË NJËSISË BAZË NË UBT.....	20
NENI 23.....	21
KRITERET PËR ANËTARËT E KOMISIONEVE TË PËRHERSHME TË NJËSIVE KRYESORE/SENATIT NË UBT.....	21
NENI 24.....	22
KANDIDIMI .....	22
NENI 25.....	22
DOKUMENTACIONI PËR KANDIDIM .....	22
NENI 26.....	23
VLERËSIMI LIGJSHMËRISË SË PROMOVIMIT AKADEMIK DHE KONTROLLIT ANTIPLAGJIATURË .....	23
NENI 27.....	25
KOHËZGJATJA E MANDATEVE .....	25
NENI 28.....	26
PËRFAQËSIMI I NJËSIVE KRYESORE NË SENATIN AKADEMIK .....	26
NENI 29.....	26
FUSHATA ZGJEDHORE NË UBT .....	26
<b>KREU V.....</b>	<b>26</b>
<b>PËRGATITJA E INFRASTRUKTURËS DHE E DOKUMENTACIONIT ZGJEDHOR .....</b>	<b>26</b>
NENI 30.....	27
VENDNDODHJA E KOMISIONEVE ZGJEDHORE DHE VENDEVE TË NUMËRIMIT TË VOTAVE .....	27
NENI 31.....	27
KOMISIONET PËR VLERËSIMIN DHE NUMËRIMIN E VOTAVE.....	27
NENI 32.....	27
PËRGATITJA E DOKUMENTACIONIT ZGJEDHOR.....	27
NENI 33.....	28
DËRGIMI I MATERIALEVE ZGJEDHORE NGA KIZ NË KZF.....	28
<b>KREU VI.....</b>	<b>29</b>
<b>VOTIMI.....</b>	<b>29</b>
NENI 34.....	29
VEPRIMET PARAPRAKE PËR HAPJEN E QENDRËS SË VOTIMIT .....	29
NENI 35.....	30
PROCEDURAT E VOTIMIT .....	30
NENI 36.....	32
MBYLLJA E VOTIMIT .....	32
NENI 37.....	32
VEPRIMET PAS MBYLLJES SË QENDRËS SË VOTIMIT .....	32
NENI 38.....	33
PROCEDURAT E VLERËSIMIT .....	33
NENI 39.....	35
ANKIMET.....	35
NENI 40.....	36
ANKIMI NE KOMISIONIN E APELIMIT .....	36
NENI 41.....	37
PAVLEFSHMËRIA E ZGJEDHJEVE .....	37
NENI 42.....	37
DISPOZITA TË FUNDIT .....	37



## KREU I DISPOZITA TË PËRGJITHSHME

### Neni 1 Objekti i Rregullores

Kjo rregullore përcakton rregullat për përgatitjen, organizimin, zhvillimin, administrimin, mbikëqyrjen, vëzhgimin, fushatën elektorale, etikën elektorale, dhe shpalljen e rezultateve të zgjedhjeve për autoritetet drejtuese dhe organet drejtuese në UBT duke përfshirë:

- a) Kushtet dhe afatet për regjistrimin e kandidatëve, të drejtat dhe detyrimet e tyre, dokumentacionin zgjedhor, listat e zgjedhësve dhe fushatat zgjedhore;
- b) Vlerësimin e ligjshmërisë së promovimit akademik, si dhe vlerësimin e kontrollit antiplagjiaturë për kandidatët e të gjitha niveleve për autoritete dhe organet drejtuese të UBT;
- c) Rregullat për organizimin dhe funksionimin e administratës zgjedhore;
- d) Kriteret për hartimin e listës së zgjedhësve;
- e) Procedurat për votimin, vlerësimin dhe numërimin e votave si dhe shpalljen e rezultateve;
- f) Procedurat për shqyrtimin e ankimimeve;
- g) Administrimin dhe ruajtjen e dokumentacionit zgjedhor.
- h) Kushtet dhe afatet për regjistrimin e vëzhguesve, të drejtat dhe detyrimet e tyre.

### Neni 2 Baza Ligjore

Kjo rregullore, mbështetet në Kushtetutën e Republikës së Shqipërisë Ligjin nr. 8485, datë 12.5.1999 "Kodi i Procedurave Administrative të Republikës së Shqipërisë", i ndryshuar me ligjin nr. 44, datë 30.04.2015, në Ligjin nr. 80/2015 "Për Arsimin e Lartë dhe Kërkimin Shkencor në institucionet e Arsimit të Lartë në Republikën e Shqipërisë" neni 131, në Urdhrin e Ministrisë së MAS-it nr. 101, datë 13/03/2024, "Për procesin zgjedhor për autoritetet dhe organet drejtuese në institucionet publike të arsimit të lartë", në Statutin e Universitetit Bujqësor të Tiranës, miratuar me Urdhër Ministri me nr. 279, date 28.07.2021, Kreu X "Procedurat Elektorale", si dhe në Rregulloren e UBT-së "Për sjellje me integritet në kërkimin shkencor & promovimin akademik në Universitetin Bujqësor të Tiranës", miratuar me Vendimin e Senatit nr. 56 datë 11/07/2019. Gjithashtu kjo rregullore bazohet dhe në ligjet nr. 138/2015 "Për garantimin e integritetit të personave që zgjidhen, emërohen ose ushtrojnë funksione publike" dhe nr. 45/2015 "Për të drejtën e informimit për dokumentet e ish-Sigurimit të Shtetit të Republikës Popullore Socialiste të Shqipërisë".





### Neni 3 Subjekti/et e Rregullores

1. Subjekt i kësaj rregulloreje është Universiteti Bujqësor i Tiranës që do ti referohet asaj në rastin e zhvillimit të proceseve zgjedhore për autoritetet drejtuese dhe Senatit Akademik.
2. Çdo anëtar i personelit akademik me kohë të plotë, i njëjste kryesore në UBT, ka të drejtën e tij të zgjedhjes dhe të zgjedhurit, në përputhje me dispozitat e parashikuara në këtë rregullore dhe në ligjin nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë".
3. Anëtarët e personelit akademik, që sipas nenit 65 të ligjit nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë", kanë mbushur moshën për pension, nuk kanë të drejtë të zgjidhen, si autoritete drejtuese apo në organet drejtuese dhe nuk bëjnë pjesë në trupën zgjedhore.
4. Anëtarët e personelit akademik që, sipas nenit 63 të ligjit nr. 80/2015 "Për arsimin e lartë dhe kërkimin shkencor në institucionet e arsimit të lartë në Republikën e Shqipërisë", shpërdorohen për një periudhë deri në 1 (një) vit për vitin sabbatik nuk kanë të drejtë të zgjidhen si autoritete drejtuese ose në Senatin Akademik, por gëzojnë të drejtën të zgjedhin autoritetet drejtuese ose Senatin Akademik, nëse periudha e parashikuara më sipër përkon me muajin zgjedhor.
5. Çdo student aktiv i ciklit të parë, ciklit të dytë, programeve DIND, programeve profesionale të larta dhe programeve të studimeve specializuese afatgjata, me kohë të plotë në UBT, kanë të drejtën e zgjedhjes së autoriteteve dhe organeve drejtuese. Çdo student ka të drejtën e zgjedhjes dhe të zgjedhurit për përfaqësuesit studentë në organet drejtuese, në përputhje me dispozitat e parashikuara në këtë rregullore dhe në ligjin nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë".

### Neni 4 Parimet e Përgjithshme

1. Zgjedhjet për autoritetet dhe organet drejtuese në UBT janë periodike, çdo 4 vjet.
2. Zgjedhjet bëhen me votim të lirë, të fshehtë, të barabartë dhe të drejtpërdrejtë, sipas rregullave të parashikuara në këtë rregullore. Zgjedhësit e ushtrojnë lirisht të drejtën e votës.
3. Çdo zgjedhës ka të drejtën e një vote të vetme për zgjedhjen e çdonjërit prej autoriteteve ose anëtarëve të organeve drejtuese të UBT (Senatit Akademik).
4. Si mjet identifikimi për të votuar pranohet pasaporta, karta e identitetit ose karta e studentit.
5. Të drejtën për t'u zgjedhur në postin e një autoriteti drejtues, (rektor dhe dekan/drejtor), e kanë edhe persona që nuk bëjnë pjesë në stafin akademik me kohë të plotë në njësitë kryesore dhe që plotësojnë kushtet e parashikuara në përputhje me dispozitat e





parashikuara në këtë rregullore dhe në ligjin nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë".

6. Të drejtën për t'u zgjedhur në postin e një autoriteti drejtues (rektor dhe dekan/drejtor) e ka çdo anëtar i personelit akademik që nuk ka fituar, në të njëjtin funksion dhe në të njëjtin institucion, dy mandate të njëpasnjëshme apo të ndara, të fituara sipas ligjit nr. 9741, datë 21.05.2007 "Për Arsimin e Lartë në Republikën e Shqipërisë, i ndryshuar me ligjin nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë", neni 39 pika 7 dhe neni 131 pika 3.
7. Në kuptim të nenit 131, pika 3 të ligjit 80/2015, "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë" mandat i fituar konsiderohet çdo mandat që është fituar nëpërmjet një procesi zgjedhor pavarësisht nga kohëzgjatja e tij.
8. Çdo kandidat nuk mund të konkurrojë njëkohësisht për më shumë se 1 (një) post autoriteti drejtues.
9. Çdo kandidat ka të drejtën të organizojë dhe zhvillojë aktivitete për paraqitjen e programit të tij, sipas kalendarit të bashkërenduar me KIZ-in e KZF-në pranë çdo njësie kryesore/filial, duke mos cenuar procesin mësimor.
10. Shpallet i zgjedhur në postin e një autoriteti drejtues kandidati që fiton numrin më të madh të votave të vlefshme të zgjedhësve që marrin pjesë në votim, me përjashtim të kandidatëve të vetëm.
11. Kur kandidon një kandidat i vetëm, ky i fundit shpallet fitues me 50 përqind plus një të votave të vlefshme. Nëse kandidati i vetëm nuk arrin të fitojë një numër të tillë votash, 15 (pesëmbëdhjetë) ditë pas ditës së zgjedhjeve zhvillohet një raund i dytë. Kur edhe pas raundit të dytë kandidati i vetëm nuk siguron 50 për qind plus një të votave të vlefshme, shpallen zgjedhje të reja.
12. Kur dy a më shumë kandidatë në garë për postin e një autoriteti drejtues dalin me rezultat të barabartë, 15 (pesëmbëdhjetë) ditë kalendarike pas zgjedhjeve zhvillohet një raund i dytë. Nëse edhe pas raundit të dytë rezultati është përsëri i barabartë, zgjedhja për autoritet drejtues bëhet me short. Shorti organizohet në prezencë të kandidatëve dhe realizohet nga Komisioni Institucional i Zgjedhjeve.
13. Në rast se për postin e një autoriteti drejtues nuk regjistrohet ose nuk fiton asnjë kandidat, zgjedhjet për këtë post zhvillohen, me urdhër të ministrit përgjegjës për arsimin, jo më përpara se 6 muaj nga data e zgjedhjeve të shpallura. Zgjedhjet e përsëritura zhvillohen në përputhje me kërkesat ligjit nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë" dhe me këtë rregullore. Gjatë periudhës kur nuk ka drejtues të zgjedhur, për caktimin e drejtuesit të njësisë veprohet sipas rregullit të përcaktuar në nenin 39, pika 9, pika 10 dhe neni 42, pika 9 të ligjit nr. 80/2015 "Për Arsimin e Lartë dhe kërkimin shkencor në institucionet e arsimit të lartë në Republikën e Shqipërisë".
14. Zgjedhje të përsëritura zhvillohen kur një autoritet drejtues apo anëtar i organeve drejtuese






- i mbaron/humbet të drejtën për të vazhduar funksionin e tij/të saj. Ato zhvillohen jo më vonë se një vit përpara përfundimit të periudhës 4-vjeçare pas zgjedhjeve të fundit.
15. Në rastin kur për anëtarë të Senatit Akademik konkurrojnë më shumë kandidatë se sa numri i mandateve të caktuara për njësinë kryesore përkatëse, fitues shpallen kandidatët që sigurojnë numrin më të madh të votave të vlefshme të zgjedhësve që marrin pjesë në votim. Për kandidatët që fitojnë numër të barabartë votash, zgjedhja për anëtar të Senatit Akademik bëhet me short. Shorti organizohet dhe realizohet nga Komisioni Institucional i Zgjedhjeve, në prani të palëve të interesuara, përveç rastit kur palët janë dakordësuar midis tyre.
  16. Në rastin kur mbeten vende vakante për anëtarë në Senatin Akademik, për arsye se numri i kandidatëve është më i vogël se numri i mandateve, në njësinë kryesore përkatëse zhvillohet një raund i dytë zgjedhjesh, 15 (pesëmbëdhjetë) ditë kalendarike pas ditës së zgjedhjeve. Për këtë raund kanë të drejtë të regjistrohen kandidatë të tjerë që i plotësojnë kriteret e parashikuara në ligjin nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë" dhe kërkesat e kësaj rregulloreje.
  17. Vëzhguesit e kandidatëve që vijnë nga personeli akademik duhet të jenë pjesë e personelit akademik me kohë të plotë në UBT. Vëzhguesit e kandidatëve që vijnë nga studentët duhet të jenë studentë të njësisë kryesore përkatëse.
  18. Të gjithë kandidatët për çdo nivel autoriteti ose organi drejtues të UBT duhet të kenë marrë paraprakisht vlerësimin pozitiv nga Këshilli i Etikës i UBT-së.

## **Neni 5**

### **Periudha Zgjedhore dhe Thirrja e Zgjedhjeve**

1. Zgjedhjet për autoritetet drejtuese dhe organet drejtuese në UBT zhvillohen në mënyrë periodike, çdo katër vjet. Procesi zgjedhor zhvillohet njëherësh për të gjitha njësitë përbërëse të UBT-së.
2. Data e fillimit të procesit zgjedhor dhe dita e zgjedhjeve caktohet nga ministri përgjegjës për arsimin.
3. Autoriteti më i lartë drejtues në UBT, shpall ditën e fillimit të procesit zgjedhor dhe datën e përcaktuar nga ministri për zgjedhjen e autoriteteve dhe senatin akademik në UBT, pas miratimit të rregullores së zgjedhjeve nga Senati Akademik.
4. Zgjedhjet e radhës për autoritetet dhe organet drejtuese në UBT zhvillohen brenda së njëjtës ditë.
5. Zgjedhjet jashtë radhe për autoritetet drejtuese thirren brenda 60 ditëve pas përfundimit para kohe të mandatit të autoritetit përkatës, nëse pjesa e mbetur e mandatit është jo më pak se një vit.
6. Qendrat e votimit hapen në orën 8.00 dhe mbyllen në orën 16.00. Askush nuk mund të votojë pasi KZF (KQV) merr vendim për mbylljen e procesit të votimit. Nëse pas orës



16:00 KZF (KQV) vëren se ka ende votues në radhë, u mbledh atyre mjetet e identifikimit dhe u mundëson votimin.

## KREU II

### INSTITUCIONET PËR PËRGATITJEN DHE ADMINISTRIMIN E ZGJEDHJEVE

#### PËR AUTORITETET DREJTUESE DHE SENATIN AKADEMIK NË UNIVERSITETIN BUJQËSOR TË TIRANËS

##### Neni 6

##### Komisioni Institucional i Zgjedhjeve (KIZ)

1. Zgjedhja e anëtarëve të KIZ është detyrë dhe përgjegjësi e Senatit Akademik të UBT-së. Senati Akademik zgjedh KIZ-in pas shpalljes së datës së zgjedhjeve, në përputhje me dispozitat e mëposhtme:
  - a) Zgjedhja e anëtarëve të KIZ bëhet mbi bazën e vetëkandidimit, bazuar në listën e të interesuarve që kanë vetëkandiduar. Vetëkandidimi bëhet në sekretarinë e Senatit Akademik. Afati nga momenti i thirrjes deri në votimin në Senat nuk duhet të jetë më shumë se dy javë. Përfaqësimi dhe numri i anëtarëve të KIZ, përcaktohet mbi bazën e numrit të njësisive kryesore të institucionit. Në çdo rast ai duhet të jetë numër tek dhe jo më i vogël se 5, njëri prej të cilëve është përfaqësues i studentëve.
  - b) Senati akademik zgjedh anëtarët e KIZ, me votim të fshehtë, me shumicën e thjeshtë të anëtarësisë nga lista e të vetëkandiduarve që regjistrohen në sekretarinë e Senatit, e cila ka detyrimin t'i pajisë kandidatët me vërtetimin e regjistrimit. Nga Senati Akademik emërohet dhe sekretari i KIZ-it, i cili është anëtar pa të drejtë vote pranë këtij komisioni, i cili përzgjidhet nga lista e të vetëkandiduarve nga personeli i UBT-së. Në rastin e largimit të një anëtari nga ky komision, zëvendësimi i tij kryhet si në pikën 1 të këtij neni.
  - c) KIZ konstituohet jo më vonë se katër ditë nga dita e shpalljes së zgjedhjeve
  - d) Anëtari i KIZ nuk ka të drejtë të kandidojë për autoritet drejtues dhe/ose për anëtar në organet drejtuese, të çdo niveli.
  - e) Në mbledhjen e parë të tij KIZ zgjedh, me shumicën e thjeshtë të votave të anëtarëve të tij, Kryetarin. Rezultati i zgjedhjeve publikohet në të gjitha mjediset e institucionit dhe në faqen zyrtare elektronike të UBT-së.
  - f) Gjatë periudhës zgjedhore, KIZ mbledhet jo më pak se tre herë në javë. Mbledhja thirret nga kryetari ose të paktën nga dy anëtarë. Mbledhja është e vlefshme kur marrin pjesë jo më pak se 2/3 e të gjithë anëtarëve. Mbledhjet e KIZ janë të hapura për çdo të interesuar. Prania e kandidatëve, vëzhguesve të kandidatëve dhe





përfaqësuesve të MARS në mbledhjet e KIZ është e lejuar.

- g) KIZ i merr vendimet me shumicën e thjeshtë të gjithë anëtarëve të tij. Vendimet e KIZ publikohen, në këndet zgjedhore të UBT-së, si dhe faqen zyrtare elektronike të UBT-së jo më vonë se 12 orë pas vendimmarrjes.

2. KIZ ka këto kompetenca:

- a) Nxjerr udhëzime për organizimin dhe zhvillimin e procesit zgjedhor në të gjitha njësitë e UBT-së.
- b) Drejton dhe kontrollon të gjithë procesin zgjedhor.
- c) Zgjedh dhe emëron anëtarët e Komisioneve të Zgjedhjeve të Fakulteteve, të vetëkandiduar në KIZ.
- d) Akrediton vëzhguesit sipas kërkesave të kandidatëve të parashikuar në këtë rregullore.
- e) Vendos për numrin e qendrave të votimit për çdo njësi kryesore.
- f) Miraton vulën për KIZ, KZF dhe vulën për kryetarin e KZF-së, si dhe të KQV- së, të cilat prodhohen dhe administrohen sipas kuadrit ligjor në fuqi. Vulat do të administrohen nga sekretaria e KIZ-it dhe KZF-së.
- g) Regjistron kandidatët për rektor dhe për anëtarë të Senatit Akademik.
- h) Shpall rezultatin e zgjedhjeve për Rektor dhe anëtarë të Senatit Akademik.
- i) Administron, gjykon dhe merr vendim për ankimet që regjistrohen prej kandidatëve.

3. Mandati i anëtarit të KIZ-it ndërpritet në rastet kur:

- a) Cenon etikën zgjedhore
- b) Kryen veprimtari në favor të një kandidati
- c) Vdes
- d) Jep dorëheqjen nga detyra
- e) Dënohet për vepra penale me vendim gjyqësor të formës së prerë
- f) Me veprimet dhe mosveprimet e tij cenon rëndë veprimtarinë e KIZ dhe procesin zgjedhor
- g) Mungon, pa shkaqe të arsyeshme, në tre mbledhje radhazi

4. Trajtimi i çështjes së ndërprerjes së mandatit të një anëtarit të KIZ në këtë rast, bëhet vetëm me kërkesën e të paktën dy anëtarëve të tij. KIZ merr vendim mbi këtë kërkesë, jo më vonë se 24 orë pas depozitimit të saj. Vendimin për ndërprerjen e mandatit e merr KIZ kur për të votojnë "Pro" jo më pak se 2/3 e anëtarëve të tij. Vendi i mbetur bosh plotësohet brenda tre ditëve prej Senatit Akademik.

5. Sekretari i KIZ përgatit materialet për çdo mbledhje të KIZ. Ai merr pjesë në mbledhje, mban procesverbalet e mbledhjeve në librin e procesverbaleve dhe për çdo rast jep shpjegime për çështjet që i kërkohen. Procesverbali i mbledhjeve duhet të firmoset nga anëtarët e pranishëm në mbledhje dhe të firmoset e vuloset nga sekretari. Sekretari i KIZ është përgjegjës për administrimin e të gjithë dokumentacionit të KIZ. Libri i procesverbaleve dhe vula e KIZ-it ruhen në ambientin e përcaktuar nga administratori për



KIZ-in.

6. Vendimet e KIZ firmosen prej të gjithë anëtarëve të pranishëm në mbledhje dhe vulosen me vulën e KIZ. Çdo anëtar i KIZ krahas nënshkrimit të tij, mund të deklarojë në vendim votën kundër.
7. Anëtarët e Komisionit Institucional të Zgjedhjeve shpërblehen për punën që bëjnë. Masa dhe mënyra e shpërblimit të tyre caktohet me vendim të Bordit të Administrimit UBT-së.
8. Kandidatët për rektor kanë të drejtë të kenë përfaqësuesin e tyre pranë KIZ, si anëtar pa të drejtë vote, gjatë muajit zgjedhor.

## Neni 7

### Komisionet e Zgjedhjeve në Fakultete

1. Vendimi për ngritjen e Komisioneve të Zgjedhjeve në Fakultete, merren nga KIZ, jo më vonë se 1 javë kalendarike nga dita e formimit të tij. KIZ zgjedh anëtarët e KZF, me votim të fshehtë, me shumicën e thjeshtë të anëtarësisë së tij, nga lista e kandidatëve që vetëkandidohen në sekretarinë e KIZ, e cila ka detyrimin t'i pajisë kandidatët me vërtetimin e regjistrimit.
2. Përfaqësimi dhe numri i anëtarëve të KZF-së përcaktohet mbi bazën e numrit të njërive bazë në njësinë kryesore përkatëse. Në çdo rast, ai duhet të jetë numër tek dhe jo më i vogël se 3 anëtarë, njëri prej të cilëve është përfaqësues i studentëve. Nga KIZ caktohet dhe sekretari i KZF-së, i cili është anëtar pa të drejtë vote pranë këtij komisioni. Sekretari përzgjidhet nga lista e të vetëkandiduarve nga personeli i njësisë kryesore të KZF-së përkatëse.
3. Anëtari i KZF-së nuk ka të drejtë të kandidojë për autoritet drejtues dhe/ose për anëtar në organet drejtuese, të cilitdo niveli.
4. Mbledhja e parë e KZF-së zhvillohet një ditë pas vendimit të KIZ për ngritjen e tij. Në këtë mbledhje zgjidhet, me shumicën e thjeshtë të votave të anëtarëve të KZF-së, kryetari. Rezultati i zgjedhjeve publikohet në mjediset ku zhvillon aktivitetin akademik njësia kryesore përkatëse, si dhe në faqen zyrtare elektronike të fakultetit
5. KZF mbledhet jo më pak se tre herë në javë. Mbledhja thirret nga kryetari ose të paktën nga dy anëtarë. Mbledhja është e vlefshme kur marrin pjesë jo më pak se 2/3 e të gjithë anëtarëve. Mbledhjet e tij janë të hapura për çdo të interesuar. Prania e kandidatëve në mbledhjet e KZF -së është e lejuar.
6. KZF i merr vendimet me shumicën e thjeshtë të gjithë anëtarëve të tij. Vendimet e KZF-së publikohen në mjedisin e njësisë kryesore, ku është vendosur zyra e tij (e përcaktuar nga administratori i njësisë kryesore), si dhe në faqen zyrtare elektronike të Fakultetit, jo më vonë se 12 orë pas marrjes se tyre.
7. KZF ka këto kompetenca:
  - a) Përgjigjet për administrimin dhe zhvillimin e zgjedhjeve në njësinë kryesore.
  - b) Kryen funksionet e Komisionit të Qendrës së Votimit për anëtarët e personelit





- akademik në rastin kur në njësinë kryesore ka vetëm një qendër votimi.
- c) Emëron kryetarin dhe anëtarët e Komisioneve të Qendrave të Votimit në rast kur, me vendim të KIZ, në njësinë kryesore votimi do të zhvillohet në më shumë se një qendër votimi.
  - d) Regjistron kandidatët për dekan të njësisë kryesore dhe për përgjegjës të njësisive bazë.
  - e) Publikon listën e zgjedhësve në mjediset e njësisë kryesore pas miratimit përfundimtar të saj, si dhe në faqen zyrtare elektronike të UBT-së, pas miratimit përfundimtar të saj.
  - f) Shpall rezultatin e zgjedhjeve për dekan të njësisë kryesore dhe për përgjegjës të njësisive bazë dhe ia dërgon KIZ-it.
  - g) Shpall rezultatin e votimit për rektorin dhe për anëtarët e Senatit Akademik, të cilin e dërgon në KIZ.
  - h) Merr vendim brenda kompetencave të veta mbi ankimet që regjistrohen prej kandidatëve.
8. Kandidatët për dekan dhe drejtues të njësisive bazë kanë të drejtë të kenë përfaqësuesin e tyre në KZF dhe KQV, si vëzhgues, të cilët akreditohen prej KIZ.
9. Mandati i anëtarit të KZF -së ndërpritet në rastet kur:
- a) Cenon etikën zgjedhore
  - b) Kryen veprimtari në favor të një kandidati
  - c) Vdes
  - d) Jep dorëheqjen nga detyra
  - e) Dënohet për vepra penale me vendim gjyqësor të formës së prerë
  - f) Me veprimet dhe mosveprimet e tij cenon rëndë veprimtarinë e KZF dhe procesin zgjedhor
  - g) Mungon, pa shkaqe të arsyeshme, në tre mbledhje radhazi.
10. Shqyrtimi i çështjes së ndërprerjes së mandatit të një anëtarit të KZF-së në këtë rast, bëhet vetëm me kërkesën e të paktën dy anëtarëve të tij, të cilët e paraqesin atë tek KIZ. Vendimin për ndërprerjen e mandatit e merr KIZ, jo më vonë se 24 orë pas paraqitjes së kërkesës. Për të, duhet të votojnë "Pro" jo më pak se 2/3 e anëtarëve të tij. Vendi bosh plotësohet brenda dy ditëve prej KIZ.
11. Sekretari përgatit materialet për çdo mbledhje të KZF-së. Ai merr pjesë në mbledhje, mban procesverbalet e mbledhjeve në librin e procesverbalit dhe për çdo rast jep shpjegime për çështjet që i kërkohen. Procesverbali i mbledhjeve duhet të firmoset nga anëtarët e pranishëm në mbledhje dhe të firmoset e vuloset nga sekretari. Sekretari është përgjegjës për administrimin e të gjithë dokumentacionit të KZF-së. Sekretari përzgjidhet nga lista e të vetëkandiduarve pjesë e personelit të njësisë kryesore.
12. Vendimet e KZF-së firmosen prej gjithë anëtarëve dhe vulosen me vulën KZF-së.
13. Anëtarët e Komisionit të Zgjedhjeve në Fakultet shpërblehen për punën që bëjnë. Masa dhe mënyra e shpërblimit të tyre caktohet me vendim të Bordit të Administrimit UBT-së.



## **Neni 8**

### **Qendrat e Votimit**

Pranë çdo njësie kryesore, caktohen Qendrat e Votimit nga KIZ. Si rregull, çdo qendër votimi ka deri në 1000 (njëmijë) zgjedhës, të gjitha trupave zgjedhore, përfshirë studentët. Në rast se njësisia kryesore ka më shumë se 1000 (njëmijë) zgjedhës, KIZ mund të caktojë më shumë se një qendër votimi për atë njësi kryesore.

## **Neni 9**

### **Komisioni i Qendrës së Votimit (KQV)**

1. Në rastin kur procesi i votimit do të zhvillohet vetëm në një qendër votimi në njësinë kryesore, detyrat e komisionit të qendrës së votimit kryhen prej KZF-së. Kur KIZ ka vendosur ngritjen e më shumë se një qendre votimi në njësinë kryesore, KZF ngrë komisionet e qendrës së votimit (KQV).
2. KQV përbëhet nga jo më pak se 3 anëtarë njëri prej të cilëve është përfaqësues i studentëve. Anëtarët e KQV emërohen prej KZF në bazë të vetëkandidimeve,
3. Vendimi për formimin e KQV-së merret prej KZF-së jo më vonë se tre ditë para ditës së votimit. Në këtë vendim caktohet edhe kryetari i KQV-së. Njëri prej anëtarëve kryen detyrat e sekretarit të KQV-së.
4. Anëtari i KQV -së nuk mund të kandidojë për asnjë post drejtues ose për anëtar në Senatin Akademik.
5. Komisioni i qendrës së votimit ka për detyrë vetëm organizimin, zhvillimin dhe mbarëvajtjen e procesit të votimit ditën e zgjedhjeve. Në përfundim të këtij procesi, KQV-ja administron materialet zgjedhore, sipas procedurës dhe rregullave të caktuara në këtë rregullore dhe i'a dorëzon atë KZF-së.

## **Neni 10**

### **Të drejtat dhe Detyrat e Vëzhguesve**

Çdo kandidat/e i/e vetëkandiduar për autoritet drejtues dhe Senatin Akademik të UBT ka të drejtë të caktojë 1 vëzhgues në KZF, KQV dhe për çdo tavolinë në vendin e numërimit të votave pas regjistrimit të kandidatit/es në procesin zgjedhor.

Organizata joqeveritare shqiptare dhe të huaja, organizata kombëtare dhe ndërkombëtare të specializuara dhe të angazhuara për mirëqeverisjen dhe demokratizimin, përfaqësues të ministrisë së linjës ose të medias kanë të drejtë të dërgojnë vëzhgues në zgjedhjet e UBT-së. Akreditimi i tyre ka të njëjtën procedurë si dhe ai vëzhguesve të kandidatëve konkurrentë, anëtarë të stafeve akademike apo studentëve në UBT. Ai bëhet mbi bazën e të dhënave vetjake të çdo vëzhguesi.





Vëzhguesit, kandidatët dhe përfaqësuesit e tyre si vëzhgues, i ndalohet rreptësishtë prishja e qetësisë, filmimi dhe bërja e fotografive gjatë procesit të votimit dhe numërimit. Në rast të shkeljes së këtyre standardeve etike, i tërhiqet vëmendja publikisht. Në rast përsëritjeje KIZ/KZF merr vendim për përjashtimin e tij/saj me shumicë votash.

1. Gjatë kryerjes së detyrave të tyre, vëzhguesit kanë këto të drejta:
  - a) të vëzhgojnë pa pengesë të gjitha aspektet e përgatitjes dhe zhvillimit të zgjedhjeve dhe të gjitha fazat e procesit zgjedhor.
  - b) të paraqesin vërejtje me shkrim para komisioneve të zgjedhjeve për çdo lloj parregullsie që vërejnë.
  - c) të shohin ose të këqyrin dokumentacionin ose materialet e procesit zgjedhor.
2. Vëzhguesit kanë këto detyra:
  - a) të respektojnë kërkesat e kesaj rregulloreje dhe udhëzimet e KIZ-së për vëzhgimin e zgjedhjeve.
  - b) të veprojnë në mënyrë të paanshme dhe të mos bëjnë propagandë për asnjë kandidat, në qendrat e votimit ose në vende të tjera të ndaluara sipas kesaj rregulloreje.
  - c) të paraqiten para komisioneve të zgjedhjeve me autorizimin e lëshuar nga KIZ, si dhe me një dokument identifikimi të pranuar nga KIZ.
  - d) të mos mbajnë shenja dalluese, që shërbejnë si mjete propagande ose që mund të ndikojnë mbi vullnetin e zgjedhësit.
  - e) të mos dhunojnë të drejtën e votuesit për të votuar në fshehtësi dhe të mos pengojnë procesin e votimit, të numërimit dhe administrimit të zgjedhjeve.

### KREU III

## ZGJEDHËSIT DHE LISTA E ZGJEDHËSVE

### Neni 11

#### Zgjedhësit dhe Përgatitja e Listës së Zgjedhësve

1. Në zgjedhjet për autoritetet dhe organet drejtuese të UBT marrin pjesë:
  - a) Anëtarët e personelit akademik me kohë të plotë të njëjësive kryesore. Anëtarët e personelit akademik, që sipas nenit 65 të ligjit nr. 80/2015 "*Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë*", kanë mbushur moshën për pension, nuk kanë të drejtë të zgjidhen, si autoritete drejtuese apo në organet drejtuese dhe nuk bëjnë pjesë në trupën zgjedhore.
  - b) Studentët aktiv që ndjekin studimet në ciklin e parë, ciklin e dytë, ciklin e tretë, programet DIND, programet profesionale të larta dhe programet e specializimit



afatgjata, me kohë të plotë. Çdo student aktiv ka të drejtën e zgjedhjes dhe të të zgjedhurit për përfaqësuesit e studentëve në Senatin Akademik, në përputhje me dispozitat e parashikuara në ligjin nr. 80/2015 “Për arsimin e lartë dhe kërkimin shkencor në institucionet e arsimit të lartë në Republikën e Shqipërisë” dhe në këtë rregullore.

2. Lista e zgjedhësve për personelin akademik hartohet për çdo njësi bazë, mbi bazën e të dhënave të regjistrit të personelit akademik, të punësuar me kohë të plotë që administrohet nga Drejtoria e Burimeve Njerëzore dhe Shërbimeve Juridike të UBT-së. Çdo zgjedhës identifikohet me përbërësit zgjedhorë:
  - a) Emri
  - b) Atësia
  - c) Mbiemri
  - d) Datëlindja
  - e) Gjinia
  - f) Njësia bazë ku është i punësuar/programi mësimor që ndjek studentin.
3. Organi përgjegjës për hartimin e listës së zgjedhësve janë strukturat e burimeve njerëzore të njësive kryesore të UBT-ë dhe njësitë bazë, departamentet/qendrat e kërkimit shkencor, ndërsa për studentët sekretaritë mësimore përkatëse,
4. Procedura për hartimin e listës së zgjedhësve është si më poshtë:
  - a) Lista paraprake e zgjedhësve për personelin akademik të njësisë bazë hartohet nga strukturat e burimeve njerëzore, brenda 15 ditëve nga fillimi i procesit zgjedhor.
  - b) Lista paraprake dërgohet në njësinë bazë përkatëse, e cila brenda 24 orëve verifikon dhe miraton përbërjen e saj. Lista e miratuar nga përgjegjësi/ i ngarkuari me detyrën e përgjegjësit të njësisë bazë, i dërgohet dekanit/drejtorit ose të ngarkuarit me detyrën e dekanit/drejtorit të njësisë kryesore, i cili e miraton dhe e shpall brenda jo më vonë se dy ditëve. Lista e miratuar afishohet në mjediset e njësisë kryesore (në këndin zgjedhor dhe faqen zyrtare elektronike të internetit). Një kopje e Listës i dërgohet KIZ-it.
  - c) Lista e miratuar duhet të jetë e firmosur në çdo faqe, prej dekanit/drejtorit ose të ngarkuarit me detyrën e dekanit/drejtorit të njësisë kryesore dhe e vulosur me vulën e njësisë kryesore.
5. Lista përfundimtare miratohet nga dekani/drejtori i njësisë kryesore.
6. Organ përgjegjës për hartimin e listës së zgjedhësve për studentët është sekretaria mësimore. Procedura për hartimin e listës së zgjedhësve për studentët është si më poshtë:
  - a) Lista paraprake e zgjedhësve për studentët e njësisë kryesore hartohet prej Zyrës së Studimeve dhe Studentëve ZSS (sekretaret përkatëse që mbulojnë njësinë kryesore) jo më vonë se 10 ditë nga fillimi i procesit zgjedhor.
  - b) Lista paraprake afishohet në mjediset e njësisë kryesore (kënd zgjedhor dhe faqen zyrtare elektronike të internetit).
  - c) Gjatë një periudhe deri në shtatë ditë pas shpalljes së listës paraprake, ZSS





- (*sekretaria mësimore*) pranon kërkesat për korrigjime.
- d) Pas verifikimit të kërkesave, ZSS (sekretaria) realizon korrigjimin e kërkuar brenda 48 orësh.
  - e) Pas përfundimit të periudhës për korrigjimin e listës, ZSS (sekretaria) harton listën përfundimtare e cila miratohet prej dekanit/drejtorit ose të ngarkuarit me detyrën e dekanit/drejtorit të njësisë kryesore. Lista e zgjedhësve për studentët afishohet në mjediset e njësisë kryesore. Një kopje e listës i dërgohet KIZ-it.
  - f) Lista e miratuar duhet të jetë e firmosur në çdo faqe, prej dekanit/drejtorit ose të ngarkuarit me detyrën e dekanit/drejtorit të njësisë kryesore dhe e vulosur me vulën e njësisë kryesore.
  - g) Lista përfundimtare miratohet nga dekani/drejtori i njësisë kryesore.
7. Shtatë ditë përpara ditës së zgjedhjeve, lista përfundimtare e zgjedhësve për personelin akademik dhe për studentët nuk mund të korrigjohet për asnjë arsye. Pas kësaj periudhe, zgjedhësit që nuk e kanë emrin në listën e zgjedhësve ose kanë gabime në përbërësit zgjedhorë, mund të votojnë vetëm në rastin kur, pas shqyrtimit të kërkesës së tyre, KIZ vendos me vendim lidhur me kërkesat për të marrë pjesë në zgjedhje. Kërkesa të tilla, KIZ mund t'i shqyrtojë deri në dy ditë përpara ditës së zgjedhjeve. Zgjedhësi i pajisur me vendimin e KIZ mund të votojë vetëm me paraqitjen e tij në Komisionin e Qendrës së Votimit.
8. E gjithë procedura për hartimin e listës së zgjedhësve për personelin akademik dhe studentët monitorohet prej KIZ. Për këtë qëllim, KIZ miraton një plan pune kalendar dhe cakton dy prej anëtarëve të tij për monitorimin e këtij procesi. Anëtarët përgjegjës raportojnë, në mënyrë periodike në KIZ, për ecurinë e procedurave për hartimin e listës së zgjedhësve.

### **Neni 12**

#### **Trupa Zgjedhorë për Anëtarët e Personelit Akademik të Senatit Akademik**

Trupa zgjedhorë për Senatit Akademik të UBT-së përbëhet nga personeli akademik me kohë të plotë i të gjitha njësive kryesore. Personel akademik me kohë të plotë, do të konsiderohet personeli i përcaktuar në neni 3 të kësaj rregulloreje si dhe në germën "a" të pikës 1 të nenit 11 të kësaj rregulloreje.

### **Neni 13**

#### **Trupa Zgjedhorë për Anëtarët Studentë të Senatit Akademik**

Trupa zgjedhorë për anëtarët studentë të Senatit Akademik të UBT-së përbëhet nga studentët të cilët ndjekin studimet me kohë të plotë të ciklit të parë, të dytë, ciklit të tretë, të programeve profesionale të larta, programeve DIND dhe programeve të specializimit afatgjata, përcaktuar në nenin 3 të kësaj rregulloreje



**Neni 14**  
**Trupa Zgjedhorë për Rektorin**

Trupa zgjedhorë për rektorin e UBT-së përbëhet nga:

- a) personeli akademik me kohë të plotë i të gjitha njësive kryesore. Personel akademik me kohë të plotë, do të konsiderohet personeli i përcaktuar në nenin 3 , si dhe ne germën "a" të pikës 1 të nenit 11 të kësaj rregulloreje.
- b) studentët e përcaktuar në nenin 3, si dhe në germën "b" të pikës 1 të nenit 11 të kësaj rregulloreje. Votat e studentëve në përzgjedhjen e rektorit llogariten në masën 10 % (dhjetë përqind) të totalit të përgjithshëm të votave.

**Neni 15**  
**Trupa Zgjedhore për Drejtuesin e Njesisë Kryesore**

Trupa zgjedhorë për drejtuesin e njësisë kryesore/filial të UBT-së përbëhet nga:

- a) personeli akademik me kohë të plotë i njësisë kryesore. Personel akademik me kohë të plotë, do të konsiderohet personeli i përcaktuar në nenin 3, si dhe germën "a" të pikës 1 të nenit 11 të kësaj rregulloreje.
- b) studentët e përcaktuar në nenin 3, si dhe germën "b" të pikës 1 të nenit 11 të kësaj rregulloreje, në atë njësi kryesore. Votat e studentëve në përzgjedhjen e drejtuesit të njësisë kryesore llogariten në masën 10% të totalit të përgjithshëm të votave.

**Neni 16**  
**Trupa Zgjedhore për Drejtuesin e Njesisë Bazë**

Trupa zgjedhore për drejtuesin e njësisë bazë të UBT-së përbëhet nga personeli akademik me kohë të plotë i njësisë bazë. Personel akademik me kohë të plotë, do të konsiderohet personeli i përcaktuar në nenin 3, si dhe germën "a" të pikës 1 të nenit 11 të kësaj rregulloreje.

**Neni 17**  
**Trupa Zgjedhorë për Anëtarët e Komisioneve të Përhershme të Njësive Kryesore**

Trupa zgjedhorë për anëtarët e komisioneve të përhershme të njësive kryesore të UBT përbëhet nga personeli akademik me kohë të plotë i njësisë kryesore. Personel akademik me kohë të plotë, do të konsiderohet personeli i përcaktuar në nenin 3 , si dhe germën "a" të pikës 1 të nenit 11 të kësaj rregulloreje.





## KREU IV

### REGJISTRIMI I KANDIDATËVE DHE FUSHATA ZGJEDHORE

#### Neni 18

#### Regjistrimi Kandidatëve

1. Procesi i regjistrimit të kandidatëve për autoritetet dhe organet drejtuese në UBT fillon ditën e shpalljes nga komisioni zgjedhor përkatës dhe përfundon në orën 16.00 të ditës së pestë kalendarike.
2. Dita për fillimin e regjistrimit të kandidatëve për Rektor dhe për anëtarë të Senatit Akademik të UBT-së shpallet prej KIZ-it, 2 (dy) ditë kalendarike pas ditës së konstituimit të tij.
3. Dita për fillimin e procedurës për regjistrimin e kandidatëve për dekan/drejtor të njësisë kryesore, përgjegjës të njësisë bazë departament/qendër kërkimi dhe për anëtarë të Komisioneve të përhershme të njësisë kryesore, shpallet prej KZF-ve 2 (dy) ditë kalendarike pas ditës së konstituimit të tyre.
4. Mosregjistrimi i kandidatëve bëhet me vendim të arsyetuar nga KIZ-i. Vendimi për mosregjistrim të kandidatëve është i ankimueshëm pranë Komisionit të Apelit në UBT.
5. Kandidatët e regjistruar pranë KIZ/KZF për autoritet drejtues në UBT dhe Senat Akademik nuk mund të heqin dorë nga kandidimi gjatë ditës së zgjedhjeve.

#### Neni 19

#### Kriteret për Anëtarët e Senatit Akademik

1. Kandidatët për anëtar të Senatit Akademik, duhet të plotësojnë kriteret e përcaktuara në ligjin nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë", Statutin e UBT-së dhe në këtë rregullore.
2. Kandidatët për anëtar të Senatit Akademik, në UBT i përkasin kategorisë "Profesor" ose kanë gradën shkencore "Doktor" ("PHD"), të fituar pranë universiteteve të vendeve anëtare të OECD-së ose BE-së. Në mungesë të kandidatëve me këtë titull dhe për efekt përfaqësimi, kategoria e tyre mund të zbresë, sipas përcaktimeve të bëra në Statutin e UBT-së, Kreu III, neni 14, Pika 8.
3. Kandidatët për anëtarë të Senatit Akademik duhet të kenë integritet të lartë akademik, veç të tjerash edhe në kuptimin e rregullshmërisë së zbatimit të procedurave të përfitimit të gradave dhe titujve akademik, si dhe rezultimit konform përcaktimeve për kontrollin antiplagjiaturë.
4. Kandidatët për anëtar të Senatit Akademik, përfaqësues të studentëve në UBT i përkasin kategorisë student të ciklit të parë, të ciklit të dytë, ciklit të tretë, student i DIND, programeve profesionale të larta dhe programeve të specializimit afatgjatë. Kandidatët



duhet të kenë notë mesatare jo më të ulët se 7 (shtatë) të provimeve të dhëna deri në momentin e kandidimit.

Në rastet kur një student i zgjedhur në Senatin Akademik përfundon studimet universitare ose humbet statusin e studentit, ai zëvendësohet nga kandidati pasardhës në renditje, për nga numri i votave të grumbulluara në zgjedhjet e fundit, deri në përfundim të mandatit të nisur. Nëse nuk ka studentë të mbetur në listë, zhvillohen përsëri zgjedhjet, siç parashikohet në këtë rregullore.

5. Nuk mund të kandidojnë për anëtar të Senatit Akademik, anëtarët e personelit akademik me kohë të plotë apo studentët që:
  - a) Janë në ndjekje penale dhe ndaj tyre është dhënë masë e sigurimit personal
  - b) Janë dënuar për vepra penale me vendim gjyqësor të formës së prerë
  - c) Janë të dënuar më parë për vepra penale
  - d) Ndaj tyre është dhënë masë disiplinore
  - e) Nuk kanë marrë vlerësim pozitiv në lidhje me ligjshmërinë e përfitimit të gradave dhe titujve akademik si dhe në vlerësimin e kontrollit antiplagjiaturë nga ana e Këshillit të Etikës.
6. Kanë papajtueshmëri në kuptim të ligjit nr. 45/2015 “Për të drejtën e informimit për dokumentet e ish-Sigurimit të Shtetit të Republikës Popullore Socialiste të Shqipërisë” dhe ligjit nr. 138/2015 “Për garantimin e integritetit të personave që zgjidhen, emërohen ose ushtrojnë funksione publike”;

## Neni 20

### Kriteret për Rektor të UBT

1. Kandidatët për rektor të UBT-së, duhet të plotësojnë kriteret e përcaktuara në ligjin nr. 80/2015 "Për Arsimin e Lartë dhe Kërkimin Shkencor në institucionet e arsimit të Lartë në Republikën e Shqipërisë", Statutin e UBT-së dhe në këtë rregullore.
2. Kandidatët për rektor të UBT-së, duhet të mbajnë titullin "Profesor" dhe mund të jenë nga radhët e personelit akademik të UBT-së ose jashtë tij. Kandidatët për rektor vetëkandidohen dhe duhet të plotësojnë kriteret e mëposhtme:
  - a) të kenë përvojë në mësimdhënie ose kërkim shkencor jo më pak se 10 (dhjetë) vjet;
  - b) të kenë përvojë akademike në cilësinë e titullarit të disiplinave të lëndëve si dhe të kenë zhvilluar programe lëndësh, të kenë përgatitur literaturë mbështetëse dhe/ose të kenë zhvilluar projekte kërkimore etj, prej të paktën 5 (pesë) vjetësh.
3. Nuk mund të kandidojnë për rektor të UBT-së, kandidatët që:
  - a) Janë në ndjekje penale dhe ndaj tyre është dhënë masë e sigurimit personal;
  - b) Janë dënuar për vepra penale me vendim gjyqësor të formës së prerë;
  - c) Janë të dënuar më parë për vepra penale;
  - d) Ndaj tyre është dhënë masë disiplinore;





- e) Kanë papajtueshmëri në kuptim të ligjit nr. 45/2015 “Për të drejtën e informimit për dokumentet e ish-Sigurimit të Shtetit të Republikës Popullore Socialiste të Shqipërisë” dhe ligjit nr. 138/2015 “Për garantimin e integritetit të personave që zgjidhen, emërohen ose ushtrojnë funksione publike”;
- f) Nuk kanë marrë vlerësim pozitiv në lidhje me ligjshmërinë e përfitimit të gradave dhe titujve akademikë si dhe në vlerësimin e kontrollit antiplagjiaturë nga ana e Këshillit të Etikës.
- g) Kanë qenë rektor të zgjedhur për dy ose më shumë mandate, të njëpasnjëshme apo të ndara në të njëjtin institucion ku do të kandidojnë. Në numrin e mandateve, sipas kësaj pike, përlllogariten mandatet e fituara sipas ligjit nr. 9741, datë 21.5.2007, "Për arsimin e lartë në Republikën e Shqipërisë", të ndryshuar, dhe të gjitha mandatet e tjera në vijim të fituara me zgjedhje pavarësisht kohëzgjatjes.
- h) Kanë mbushur moshën për pension sipas nenit 65 të ligjit nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë"..
- i) Kandidojnë për autoritete të tjera drejtuese.

## Neni 21

### Kriteret për Drejtues të Njesisë Kryesore në UBT

1. Kandidatët për drejtues të njësisë kryesore në UBT, duhet të plotësojnë kriteret e përcaktuara në nenin 42 pika 3 të ligjit nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë", në nenin 24, pika 6 e Statutit të UBT-së dhe në këtë rregullore.
2. Kandidatët për drejtues të njësisë kryesore në UBT i përkasin kategorisë "Profesor" dhe mund të vijnë nga radhët e personelit akademik të tij ose jashtë tij. Kandidatët për drejtues të njësisë kryesore vetëkandidohen dhe duhet të plotësojnë kriteret e mëposhtme:
  - a) të kenë përvojë në mësimdhënie ose kërkim shkencor jo më pak se 10 (dhjetë) vjet;
  - b) të kenë përvojë akademike në cilësinë e titullarit të disiplinave të lëndëve, si dhe të kenë zhvilluar programe lëndësh, të kenë përgatitur literaturë mbështetëse dhe ose të kenë zhvilluar projekte kërkimore etj., prej të paktën 5 (pesë) vjetësh.
3. Nuk mund të kandidojnë për drejtues të njësisë kryesore në UBT, kandidatët që:
  - a. Janë në ndjekje penale dhe ndaj tyre është dhënë masë e sigurimit personal;
  - b. Janë dënuar për vepra penale me vendim gjyqësor të formës së prerë;
  - c. Janë të dënuar më parë për vepra penale;
  - d. Ndaj tyre është dhënë masë disiplinore;
  - e. Nuk kanë marrë vlerësim pozitiv në lidhje me ligjshmërinë e përfitimit të gradave dhe titujve akademik si dhe në vlerësimin e kontrollit antiplagjiaturë nga ana e Këshillit të Etikës.
  - f. Kanë qenë drejtues të njësisë kryesore të zgjedhur për dy ose më shumë mandate,





të njëpasnjëshme apo të ndara në të njëjtin institucion ku do të kandidojnë. Në numrin e mandateve, sipas kësaj pike, përlllogariten mandatet e fituara sipas ligjit nr. 9741, datë 21.5.2007, "Për Arsimin e Lartë në Republikën e Shqipërisë", të ndryshuar, dhe të gjitha mandatet e tjera në vijim të fituara me zgjedhje-pavarësisht kohëzgjatjes.

- g. Kanë mbushur moshën për pension sipas nenit 65 të ligjit nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë".
- h. Kandidojnë për autoritete të tjera drejtuese.
- i. kanë papajtueshmëri në kuptim të ligjit nr. 45/2015 "Për të drejtën e informimit për dokumentet e ish-Sigurimit të Shtetit të Republikës Popullore Socialiste të Shqipërisë" dhe ligjit nr. 138/2015 "Për garantimin e integritetit të personave që zgjidhen, emërohen ose ushtrojnë funksione publike".

## Neni 22

### Kriteret për Drejtues të Njesisë Bazë në UBT

1. Kandidatët për drejtues të njesisë bazë në UBT, duhet të plotësojnë kriteret e përcaktuara në nenin 45 pika 3 të ligjit nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë", nenin 25, pika 4 e Statutit të UBT-së dhe në këtë rregullore.
2. Kandidatët për drejtues të njesisë bazë në UBT, janë personel akademik me kohë të plotë të njesisë bazë që i përkasin kategorisë "Profesor" ose kanë gradën shkencore "Doktor" ("PHD"), të fituar pranë universiteteve të vendeve anëtarë të OECD-së ose BE-së. Në rastet kur nuk ka kandidatë të kësaj kategorie, mund të kandidojë për drejtues edhe lektori, kur ky i fundit mban gradën shkencore "Doktor". Kandidatët për drejtues të njesisë bazë duhet:
  - a) të kenë përvojë në mësimdhënie për një periudhë jo më pak se 5 (pesë) vjet dhe të jenë pjesë e personelit akademik me kohë të plotë;
  - b) të kenë veprimtari të spikatur akademike, kërkimore dhe shkencore të vazhdueshme.
3. Nuk mund të kandidojnë për drejtues të njesisë bazë në UBT, kandidatët që:
  - a. Janë në ndjekje penale dhe ndaj tyre është dhënë masë e sigurimit personal;
  - b. Janë dënuar për vepra penale me vendim gjyqësor të formës së prerë;
  - c. Janë të dënuar më parë për vepra penale;
  - d. Ndaj tyre është dhënë masë disiplinore;
  - e. Nuk kanë marrë vlerësim pozitiv në lidhje me ligjshmërinë e përfitimit të gradave dhe titujve akademik si dhe në vlerësimin e kontrollit antiplagjiaturë nga ana e Këshillit të Etikës.
  - f. Kanë qenë drejtues të njesisë bazë të zgjedhur për dy ose më shumë mandate, të njëpasnjëshme apo të ndara në të njëjtin institucion ku do të kandidojnë. Në numrin





- e mandateve, sipas kësaj pike, përllogariten mandatet e fituara sipas ligjit nr. 9741, datë 21.5.2007, "Për arsimin e lartë në Republikën e Shqipërisë", të ndryshuar, dhe të gjitha mandatet e tjera në vijim të fituara me zgjedhje pavarësisht kohëzgjatjes.
- g. Kanë mbushur moshën për pension sipas nenit 65 të ligjit nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë".
  - h. Kanë papajtueshmëri në kuptim të ligjit nr. 45/2015 "Për të drejtën e informimit për dokumentet e ish-Sigurimit të Shtetit të Republikës Popullore Socialiste të Shqipërisë" dhe ligjit nr. 138/2015 "Për garantimin e integritetit të personave që zgjidhen, emërohen ose ushtrojnë funksione publike";
  - i. Kandidojnë për autoritete të tjera drejtuese.

### Neni 23

#### Kriteret për Anëtarët e Komisioneve të Përhershme të Njësive Kryesore/Senatit në UBT

1. Kandidatët për anëtarë të komisioneve të përhershme të njësive kryesore dhe Senatit në UBT, duhet të plotësojnë kriteret e përcaktuara në këtë rregullore dhe në ligjin nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë". Kandidatët për anëtarë të Komisioneve të Përhershme të njësive kryesore dhe Senat duhet të kenë integritet të lartë akademik, veç të tjerash edhe, në kuptimin e rregullshmërisë së zbatimit të procedurave të përfitimit të gradave dhe titujve akademik, si dhe rezultimit konform përcaktimeve për kontrollin antiplagjiaturë.
2. Numri i komisioneve dhe vendeve për anëtarë të komisioneve të përhershme të njësive kryesore dhe në Senat, përcaktohen nga Senati Akademik në përputhje me përcaktimet e statutit të UBT-së, por jo më pak se pesë anëtarë për secilin komision. Në përbërje të komisioneve të përhershme përfaqësohen edhe studentët, sipas përcaktimeve të Statutit të UBT-së, me përjashtim të Komisionit për Dhënien e Gradës Shkencore "Doktor" dhe Komisionit për Promovimin e Personelit Akademik, në rast se institucionet e gëzojnë të drejtën për ngritjen e këtyre komisioneve.
3. Kandidatët për anëtarë të komisioneve të përhershme të njësive kryesore dhe në Senat, vijnë nga radhët e personelit akademik të UBT-së.
4. Nuk mund të kandidojnë për anëtarë të komisioneve të përhershme të njësive kryesore dhe në Senat, kandidatët që:
  - a) Janë në ndjekje penale dhe ndaj tyre është dhënë masë e sigurimit personal;
  - b) Janë dënuar për vepra penale me vendim gjyqësor të formës së prerë;
  - c) Janë të dënuar më parë për vepra penale;
  - d) Ndaj tyre është dhënë masë disiplinore;
  - e) Nuk kanë marrë vlerësim pozitiv në lidhje me ligjshmërinë e përfitimit të gradave dhe titujve akademikë si dhe në vlerësimin e kontrollit antiplagjiaturë nga ana e Këshillit të Etikës.



## Neni 24 Kandidimi

1. Kandidatët për autoritete drejtuese të gjithë niveleve, për Senatin akademik dhe komisionet e përhershme, vetëkandidohen.
2. Kandidatët për Senatin Akademik, përfaqësues të studentëve, të cilët plotësojnë kriteret e përcaktuara në këtë rregullore propozohen nga jo më pak se 30 studentë, pjesë e trupës zgjedhore, të cilët mbështesin vetëm 1 (një) kandidat. Në fletën që dëshmon për mbështetjen nga 30 studentë, duhet të jenë pasqyruar emri, mbiemri, mjeti i identifikimit si dhe fakulteti/dega nga vjen studenti.
3. Dokumentet e kandidimit duhet të jenë në përputhje me kërkesat e ligjit nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë", Statutin e UBT-së dhe kërkesat e kësaj rregulloreje.

## Neni 25 Dokumentacioni për Kandidim

1. Dokumentacioni për kandidim nga kandidatët dorëzohet në KIZ dhe KZF dhe përmban:
  - a) Kërkesën për kandidim, e cila përmban, emrin; atësinë; mbiemrin; datëlindjen; gjininë; shprehjen e vullnetit për kandidim;
  - b) Deklarimin se kandidati nuk ka fituar dy mandate sipas ligjit nr. 9741, datë 21.5.2007, "Për Arsimin e Lartë në Republikën e Shqipërisë", si autoritet drejtues në postin për të cilin kërkon të kandidojë;
  - c) Dëshminë e penalitetit;
  - d) Deklarimin se nuk ka shkak për të qënë objekt i ligjit nr. 138/2015 "Për garantimin e integritetit të personave që zgjidhen, emërohen ose ushtrojnë funksione publike" dhe ligjit nr. 45/2015 "Për të drejtën e informimit për dokumentet e ish-sigurimit të shtetit të Republikës Popullore Socialiste të Shqipërisë";
  - e) Kopje të dokumentit të identifikimit;
  - f) Kopje të noterizuar të titullit akademik;
  - g) Vërtetimin e verifikimit të ligjshmërisë së dosjes të promovimit akademik dhe vlerësimin antiplagjiaturë për kandidatët e të gjitha niveleve për autoritete dhe organet drejtuese të UBT, të lëshuar nga Këshilli i Etikës së UBT-së;
  - h) Dokumentin që vërteton vendin ku kandidati është i punësuar dhe vitet e punësimit.
2. Dokumentet e kandidimit për studentët dorëzohen në KIZ, dhe përmbajnë:
  - a) Kërkesën për kandidim, e cila përfshin, emrin, atësinë, mbiemrin, datëlindjen, gjininë dhe shprehjen e vullnetit për kandidim.
  - b) Kopje të dokumentit të identifikimit





- c) Vërtetimin që provon se është student me kohë të plotë në një nga njësitë kryesore të UBT-së/kartën e studentit
  - d) Propozimin nga jo më pak se 30 studentë pjesë e trupës zgjedhore sipas standardeve të parashikuara në këtë rregullore, të cilët krahas emrit, mbiemrit dhe nënshkrimit vendosin në shkresën e propozimit edhe numrin personal të kartës së identitetit;
  - e) dokumentin që vërteton mesataren e notës mbi bazën e provimeve të dhëna deri në momentin e kandidimit e cila duhet të jetë jo më e ulët se 7 (shtatë).
3. Pas verifikimit të dokumentacionit KIZ, jo më vonë se 48 orë nga përfundimi i afatit të paraqitjes së kërkesave për kandidim, miraton listën e kandidatëve për rektor dhe të kandidatëve për Senatit Akademik. Listat shpallen publikisht në mjediset e të gjithë njësive kryesore të UBT-së (kënd zgjedhor), si dhe në faqen zyrtare elektronike të UBT-së.
  4. Pas verifikimit të dokumentacionit, KZF, jo më vonë se 48 orë nga përfundimi i afatit të paraqitjes së kërkesave për kandidim, miraton listën e kandidatëve për drejtues, dekan/drejtor, të njësisë kryesore, dhe listën e kandidatëve për drejtues të njësisë bazë/qendrës së kërkimit shkencor, për secilin prej njësive bazë qendrave të kërkimit shkencor të njësisë kryesore dhe të kandidatëve për komisionet e përhershme, si dhe listën e kandidatëve për anëtar të Senatit Akademik.
  5. Pas regjistrimit, çdo kandidati i jepet vërtetimi i regjistrimit (tip) si kandidat prej komisionit zgjedhor që kryen regjistrimin e tij. Forma e këtij vërtetimi miratohet me vendim të KIZ.

## Neni 26

### Vlerësimi Ligjshmërisë së Promovimit Akademik dhe kontrollit antiplagjiaturë

#### A. Të përgjithshme:

1. Vlerësimi të ligjshmërisë së Promovimit Akademik dhe kontrollit antiplagjiaturë i nënshtrohen të gjithë kandidatët për autoritete drejtuese, anëtarë të organeve dhe anëtarë të komisioneve të përhershme të parashikuara në ligj, të gjitha niveleve në UBT.
2. Vlerësimi i ligjshmërisë së Promovimit akademik bëhet mbi dosjen e të gjitha titujve të fituar nga kandidati dhe është vlerësim teknik i përputhshmërisë së aktiviteteve akademike me kërkesat ligjore të asaj periudhe së cilës i përket koha e marrjes së titullit.
3. Vërtetimi për vlerësimin e ligjshmërisë së Promovimit Akademik jepet nga Këshilli i Etikës së UBT-së bazuar mbi një raport teknik, të paraqitur pranë këtij këshilli, nga një Komision Teknik Ad-Hoc i vlerësimi që do të ngrihet në nivel Universiteti.
4. Kandidatët që e kanë kaluar kontrollin e vlerësimi të ligjshmërisë dhe e provojnë me vërtetim të lëshuar nga Këshilli i Etikës i UBT-së, nuk i nënshtrohen përsëri këtij vlerësimi.
5. Vlerësimi të kontrollit antiplagjiaturë i nënshtrohen të gjithë kandidatët për autoritete drejtuese, anëtarë të organeve dhe anëtarë të komisioneve të përhershme të parashikuara në ligj.





6. Kandidatët që e kanë kaluar kontrollin antiplagjiaturë dhe e provojnë me vërtetim të lëshuar nga Këshilli i Etikës i UBT-së, nuk i nënshtrohen përsëri këtij kontrolli.
7. Përjashtohen nga vlerësimet për antiplagjiaturë të gjithë kandidatët të cilët kanë kryer studimet e plota të doktoraturës në një nga vendet e BE, të OECD dhe vendet e G20.
8. Vlerësimi i antiplagjiaturës së doktoraturës kryhet për dokumentin zyrtar të paraqitur nga kandidati. Dokumenti i doktoraturës duhet të dorëzohet nga kandidati në versionin Word të lexueshëm.
9. Vlerësimi antiplagjiaturë do të realizohet me softuerë të posaçëm të kontraktuar nga UBT.
10. Vërtetimi për kontrollin antiplagjiaturë jepet nga Këshilli i Etikës së UBT-së, bazuar mbi një raport teknik të paraqitur pranë këtij Këshilli nga një Komision Teknik Ad-Hoc i vlerësimit që do të ngrihet në nivel Universiteti.
11. Rezultatet e Vlerësimit të ligjshmërisë së Promovimit akademik dhe kontrollit antiplagjiaturë janë konfidenciale dhe i komunikohen vetëm të interesuarit dosja e të cilit vlerësohet shoqëruar edhe me dokumentin i cili e vërteton këtë.

**B. Komisioni Teknik Ad-Hoc për vlerësimin dhe detyrat e tij:**

1. Për vlerësimin e ligjshmërisë së Promovimit Akademik dhe të kontrollit antiplagjiaturë, pranë UBT-së ngrihet një Komision Teknik Ad-Hoc me emërtimin “Komisioni i Ligjshmërisë së Promovimit Akademik dhe Kontrollit Antiplagjiaturë”.
2. Komisioni i Ligjshmërisë së Promovimit Akademik dhe Kontrollit Antiplagjiaturë do të ketë në përbërjen e tij 8 (tetë) anëtarë, nga të cilët 5 staf akademik (nga 1 për çdo njësi kryesore), 2 staf IT dhe 1 (një) staf nga burimet njerëzore. Anëtarët e stafit akademik të këtij komisioni, nuk mund të kandidojnë për autoritete drejtues Rektor, Dekan dhe Përgjegjës departamenti. Të drejtën e votës në këtë komision e kanë vetëm 5 (pesë) anëtarët e stafit akademik.
3. Komisioni Teknik Ad-Hoc do të kryesohet nga kryetari i cili do të përzgjidhet nga Senati, me propozim të Rektoratit. Lejohen të kandidojnë anëtarë të stafit akademik të cilët kanë profil të lartë dhe integritet akademik, që mund të jenë kandidatë për anëtarë komisionesh dhe organesh, por jo kandidatë për autoritete drejtuese Rektor, Dekan dhe Përgjegjës departamenti. Kandidatët duhet të jenë të kategorisë Profesor që kanë siguruar vlerësimin antiplagjiaturë ose me titullin Doktor fituar në një vendet e BE, OECD-së ose vendet e G20.
4. Komisioni ngrihet me vendim Senati dhe fillon aktivitetin, së paku, tre javë para datës së fillimit të fushatës zgjedhore dhe përfundon punën me fillimin e regjistrimeve të kandidatëve për autoritete/organe/komisione.
5. Komisioni përgatit një rregullore të brendshme të funksionimit të tij si dhe të procedurave të detajuara që do të aplikohen për Vlerësim.
6. Anëtarët e këtij komisioni shpërblehen për punën që bëjnë. Masa dhe mënyra e shpërblimit të tyre caktohet me vendim të Bordit të Administrimit UBT-së.





### C. Procedura dhe vendime:

1. Të gjithë kandidatët që konkurrojnë për të gjitha nivelet në UBT duhet të paraqesin kërkesën e tyre për vlerësim në Komision duke filluar nga data e funksionimit të Komisionit, por jo më vonë se data e fillimit të fushatës zgjedhore. Së bashku me kërkesën për vlerësim, sipas formatit që do të vihet në dispozicion nga ana e Komisionit, do të depozitohet Skeda përmbledhëse me të dhënat për titullin me të fundit.
2. Për secilin kandidat, dërgohet raporti i vlerësimit të dosjes në Këshillin e Etikës brenda një afati dy javor nga fillimi i shqyrtimit të dosjes së kandidatit, në një format të parapërgatitur nga Komisioni. Rezultatet e vlerësimit i jepen edhe personit të vlerësuar.
3. Këshilli i Etikës bazuar mbi raportet teknike merr vendim për kandidatin dhe e certifikon atë me një vërtetim. Subjekti nëpërmjet këtij vërtetimi dhe gjithë dokumentacionit të kërkuar regjistrohet në KIZ/KZF si kandidat për autoritete drejtuese, anëtarë të organeve dhe anëtarë të komisioneve të përhershme të parashikuara nga ligji të gjitha niveleve në UBT.
4. Të gjithë kandidatët, së bashku me kërkesën për vlerësim, sipas formatit që do të vihet në dispozicion nga ana e Komisionit, do të depozitojnë edhe:
  - a) Punimin e doktoraturës në versionin Word të lexueshëm, në kopje elektronike.
  - b) Vetëdeklarimi se punimi është version origjinal dhe i njëjtë me origjinalin zyrtar të mbrojtur.
  - c) Kandidatët që kanë mbaruar doktoraturën jashtë vendit, siç specifikohet më sipër, duhet të dorëzojnë Kopjen e Certifikatës së Doktoraturës të njehsuar nga MAS.
5. Raporti Teknik i kontrollit antiplagjiaturë i dërgohet Këshillit të Etikës të UBT brenda një afati dy javor, nga fillimi i shqyrtimit të dosjes së kandidatit, në një format të parapërgatitur nga komisioni.
6. Këshilli i Etikës, për vlerësimin antiplagjiaturë, i referohet Rregullores «Për sjellje me integritet në kërkimin shkencor dhe promovimin akademik në Universitetin Bujqësor të Tiranës » datë 11/07/2019, neni 5/10 dhe neni 16.
7. Këshilli i Etikës bazuar mbi raportet teknike merr vendim për kandidatin dhe e certifikon atë me një vërtetim që tërhiqet pranë Sektorit të Dokumentacionit në UBT.
8. Subjekti me këtë vërtetim dhe gjithë dokumentacionin e kërkuar regjistrohet në KIZ/KZF si kandidat për autoritete drejtuese, anëtarë të organeve dhe anëtarë të komisioneve të përhershme të parashikuara nga ligji, të gjitha niveleve në UBT.
9. Ankimimet ndaj vendimeve të Këshillit të Etikës bëhen në Komisionin e Apelit të UBT.

**Neni 27**  
**Kohëzgjatja e Mandateve**



1. Organet dhe autoritetet drejtuese zgjidhen për një mandat 4-vjeçar, ndërsa komisionet e përhershme të njësive kryesore zgjidhen për një mandat 2-vjeçar. Rastet e ndërprerjes së mandateve përcaktohen në kuadrin ligjor në fuqi.
2. Mandati i anëtarëve të KIZ-it/KZF-së dhe Komisionit të Apelistit është 4-vjeçar.

### **Neni 28**

#### **Përfaqësimi i Njësive Kryesore në Senatin Akademik**

1. Numri i anëtarëve të Senatit Akademik të ardhshëm është i përcaktuar në Statutin e UBT.
2. Niveli i përfaqësimit të njësive kryesore akademike në senat diskutohet dhe miratohet në Senatin Akademik para fillimit të procesit zgjedhor
3. Numri i përfaqësuesve duhet të jetë numër tek.
4. Numri i përfaqësuesve në Senatin Akademik për studentët duhet të jetë në masën 10% (dhjetë përqind) të numrit të anëtarëve të Senatit.

### **Neni 29**

#### **Fushata Zgjedhore në UBT**

1. Fushata zgjedhore fillon në datën e përcaktuar nga urdhri i autoritetit përkatës (ministri/rektori).
2. Fushata zgjedhore përfundon 24 orë para ditës së zgjedhjeve. Dita para datës së zgjedhjeve dhe data e zgjedhjeve deri në mbylljen e votimit, formojnë periudhën e heshtjes zgjedhore. Në periudhën e heshtjes zgjedhore nuk lejohet asnjë lloj fushate zgjedhore.
3. Administratorët dhe administrata e UBT-së duhet t'u krijojë kushte të përshtatshme dhe të barabarta të gjithë kandidatëve për të zhvilluar aktivitetet e tyre në kuadër të fushatës elektorale. Në përputhje me kërkesën e kandidatit bashkërenduar edhe me kalendarin e miratuar nga KIZ/KZF për kohën dhe vendin për zhvillimin e aktivitetit, administrata e institucionit merr të gjitha masat e nevojshme për zhvillimin e tij, jashtë orëve të mësimi që zhvillohen në institucion. Administratorët dhe administrata e UBT-së në asnjë rast nuk duhet të përfshihen në procesin zgjedhor në favor të ndonjë kandidati.

## **KREU V**

### **PËRGATITJA E INFRASTRUKTURËS DHE E DOKUMENTACIONIT ZGJEDHOR**





### Neni 30

#### Vendndodhja e Komisioneve Zgjedhore dhe Vendeve të Numërimit të Votave

1. Vendndodhja e komisioneve zgjedhore përcaktohet sipas rregullit të mëposhtëm:
  - a) Selia e KIZ-it vendoset në godinën ku ndodhet administrata qendrore e UBT-së.
  - b) Selia e KZF-së vendoset në godinën ku zhvillon aktivitetin mësimor ose kërkimor njësia kryesore/filiali.
  - c) Zyrat e KIZ/KZF pajisen nga administratori përkatës ku zhvillohet aktiviteti me logjistikën e nevojshme për aktivitetin e tyre.
2. Vendet e numërimit të votave përcaktohen sipas rregullit të mëposhtëm:
  - a) Votat për rektor, drejtuesin e njësisë kryesore, drejtuesin e njësië bazë/qendrës së kërkimit shkencor dhe për anëtar të Senatit Akademik, anëtar të Komisioneve të Përhershme numërohen në një sallë në godinën ku zhvillon aktivitetin mësimor ose kërkimor njësia kryesore.
  - b) Vendet e numërimit të votave duhet të jenë salla me përmasa të mëdha, të cilat të krijojnë mundësinë, për zhvillimin normal të procesit të numërimit të votave. Organizimi i sallës për numërimin e votave duhet të bëhet i tillë që t'iu japë mundësi përfaqësuesit të MAS, vëzhguesve dhe kandidatëve të vëzhgojnë procesin e vlerësimit dhe numërimit të votave.

### Neni 31

#### Komisionet për Vlerësimin dhe Numërimin e Votave

1. Votat për rektor, anëtarë të Senatit Akademik, drejtues të njësisë kryesore, drejtues të njësisë bazë qendrës së kërkimit shkencor dhe për anëtarë të komisioneve të përhershme të njësisive kryesore, vlerësohen dhe numërohen prej KZF-së.
2. KZF, pas numërimit të votave, plotëson tabelat zgjedhore për secilën kategori dhe ia përcjell KIZ-it, brenda 24 orëve nga ora e mbylljes së procesit të votimit.
3. KIZ, pas kalimit të afateve për ankimin, shpall fituesit sipas përcaktimeve në këtë rregullore.

### Neni 32

#### Përgatitja e Dokumentacionit Zgjedhor

1. Për zgjedhjet për autoritetet drejtuese dhe Senatit Akademik, personeli akademik voton me pesë fleta me ngjyra të ndryshme të dallueshme nga njëra-tjetra:
  - a) Fletëvotimi për rektor;
  - b) Fletëvotimi për drejtues të njësisë kryesore;
  - c) Fletëvotimi për drejtues të njësisë bazë /qendrës së kërkimit shkencor;
  - d) Fletëvotimi për anëtar të Senatit Akademik nga personeli akademik;
  - e) Fletëvotimi për komisionet e përhershme nga personeli akademik;



2. Për zgjedhjet për autoritetet drejtuese dhe Senatit Akademik studentët votojnë me katër fletë votimi me ngjyra të ndryshme të dallueshme nga njëra-tjetra:
  - a) Fletëvotimi për rektor;
  - b) Fletëvotimi për drejtues të njësisë kryesore;
  - c) Fletëvotimi për anëtarë të Senatit Akademik, përfaqësues i studentëve;
  - d) Fletëvotimi për anëtarë të komisioneve të përhershme, përfaqësues të studentëve;
3. Sasia e fletëve të votimit është e barabartë me numrin e zgjedhësve sipas listës përfundimtare, duke i shtuar 2 % (dy përqind).
4. Standardet e fletës së votimit hartohen dhe miratohen nga KIZ-i. Duhet të jetë prej letre, me ngjyrë dhe trashësi që të mos lejojë leximin e votës në pjesën e pasme të saj. Fletët e votimit prodhohen në blloqe pa kundër fletë me numra serial unik. Informacioni që përmban fleta e votimit është:
  - a) Në krye të fletës së votimit vendoset emërtesa për të cilin do të përdoret;
  - b) Emërtimi i autoritetit drejtues ose Senati Akademik;
  - c) Emri, atësia, mbiemri për kandidatët e regjistruar për autoritetin ose organin drejtues përkatës, të cilët renditen sipas rendit alfabetik;
  - d) Në rastin kur për autoritetin drejtues ose anëtar i Senatit Akademik është regjistruar dhe konkurren vetëm një kandidat, në fletën e votimit krahas emrit të tij vendosen alterantivat për votim "Pro" ose "Kundër";
  - e) Fleta e votimit për studentët në sfond të saj ka të shkruar "Për student".

### Neni 33

#### Dërgimi i Materialeve Zgjedhore nga KIZ në KZF

1. Një ditë përpara datës së zgjedhjeve, KIZ dërgon në KZF materialet zgjedhore, si më poshtë:
  - a) Fletët e votimit për personelin akademik dhe për studentët, sipas nenit 29 pika 3 të kësaj rregulloreje, në përputhje me numrin e votuesve në njësinë kryesore të UBT-së;
  - b) Listën përfundimtare të zgjedhësve për personelin akademik dhe listën e zgjedhësve për studentët të vulosura nga KIZ;
  - c) Vulën e KZF-së;
  - d) Vulën e KQV -së, në rast se në njësinë kryesore do të ketë më shumë se një qendër votimi.
  - e) Procesverbalet e qendrës së votimit, ku bëjnë pjesë procesverbalet për vulosjen e kutive të votimit, hapjen e qendrës së votimit, pezullimin e votimit, si dhe mbylljen e votimit;
  - f) Zarfën në të cilin është shënuar "Fletëvotimi të dëmtuara";
  - g) Zarfën në të cilin është shënuar "Fletëvotimi të papërdorura";
  - h) Zarfën në të cilin është shënuar "Zarfi i procesverbalit të vulosjes";





2. Përveç kutisë me materiale zgjedhore në KZF, dërgohen edhe kutitë e votimit:
- a) Kutia e votimit për rektor;
  - b) Kutia e votimit për dekan/drejtor të njësisë kryesore;
  - c) Kutia e votimit për përgjegjës të njësisë bazë/ qendër e kërkimit shkencor;
  - d) Kutia e votimit për anëtarët e Senatit Akademik nga personeli akademik i njësisë kryesore;
  - e) Kutia e votimit për anëtar të Senatit Akademik, përfaqësues i studentëve;
  - f) Kutitë e votimit për Komisionet e përhershme;
  - g) Librin e Protokollit të Mbledhjeve të KZF-së;
  - h) Tabelat për rezultatin e zgjedhjeve për secilën kategori;
  - i) Dhomat e fshehta.
  - j) Vulat me kodet e sigurisë.

## KREU VI

### VOTIMI

#### Neni 34

#### Veprimet Paraprake për Hapjen e Qendrës së Votimit

1. KZF nën drejtimin e kryetarit dhe sekretarit dhe në prani të vëzhguesve, një orë përpara hapjes së qendrës së votimit, kryen këto detyra:
- a) vendos tryezat, karriget, dhomën e fshehtë dhe kutitë e votimit në mënyrë të tillë që të sigurohet fshehtësia e votimit, lëvizja e shpejtë dhe e lirshme e zgjedhësve;
  - b) afishon udhëzimet për kryerjen e votimit në një vend të përshtatshëm dhe të dukshëm brenda qendrës së votimit; si dhe afishon tabelat që ndalojnë përdorimin e çdo objekti që cenon fshehtësinë e votës;
  - c) kontrollon të gjitha materialet e marra në dorëzim;
  - d) u tregon vëzhguesve kutitë e votimit të zbrazëta, Në faqen e përparme të çdo kutie votimi vendoset emërtimi për autoritetin që do të votohet me ngjyrë të njëjtë me atë të fletës përkatëse të votimit.
  - e) mbyll kutitë e votimit me kodet e sigurisë dhe i shkruan këto kode në procesverbalin e vulosjes së kutive të votimit dhe në Librin e Protokollit të Mbledhjeve, i cili nënshkruhet nga të gjithë anëtarët e KQV-së. Procesverbali mbyllet në zarfë ku është shkruar "Zarfë i procesverbalit të vulosjes", i cili futet në kutinë e votimit për rektor para fillimit të procesit të votimit, si dhe sigurohet që në ambientet zgjedhore të mos ketë persona dhe shenja që cenojnë parimin e paanshmërisë dhe drejtësisë në procesin zgjedhor.



2. Anëtarët e KZF-së, në prani të kandidatëve, vëzhguesve të akredituar nga KIZ dhe përfaqësuesve të MAS, në rast se paraqiten, marrin vendim për hapjen e votimit dhe e nënshkruajnë atë.
3. Të njëjtat veprime kryhen edhe nga KQV-ja në rastin kur në njësinë kryesore votimi kryhet në më shumë se një qendër votimi.


### **Neni 35** **Procedurat e Votimit**

1. Votimet për autoritetet drejtuese të gjitha niveleve dhe Senatin Akademik në UBT zhvillohen në një ditë të vetme, në datën e caktuar nga Ministri i Arsimit dhe Sportit për proceset zgjedhore të radhës.
2. Pas kryerjes së detyrave të përcaktuara në këtë rregullore, kryetari i KZF -së (KQV) deklaron hapjen e votimit jo më përpara se ora 8.00.
3. Sekretari shënon në Librin e Protokollit të KZF-së (KQV) kohën e largimit dhe të kthimit të çdo anëtari të komisionit prej qendrës së votimit. Kur kryetari largohet nga qendra e votimit, ai ia kalon vulën e kryetarit për përdorim një anëtari të komisionit.
4. Fletët e votimit vulosen, në pjesën e pasme, në vendin e caktuar me vulën e KZF- së të cilat mbajnë respektivisht shkrimin "KZF dhe emrin e Njesisë kryesore".
5. Në qendrën e votimit vendosen kuti votimi në numër të barabartë me numrin e autoriteteve drejtuese, rektor, dekan/drejtor, përgjegjës departamenti/qendër shkencore dhe komisione të përhershme për të cilat kryhet votimi në njësinë kryesore të UBT dhe dy kuti për Senatin akademik një për anëtarët e Senatit nga personeli akademik dhe një për anëtar Senati përfaqësues i studentëve.
6. Zgjedhësit qëndrojnë në radhë jashtë qendrës së votimit dhe futen njëri pas tjetrit në qendrën e votimit për të votuar, me thirrjen e një anëtari të komisionit. Pasi hyn në qendrën e votimit:
  - a. zgjedhësi thotë emrin e tij, nëse është personel akademik apo student, njësinë bazë ku bën pjesë dhe paraqet para komisionit një nga dokumentet zyrtare të vlefshme të identitetit me të dhëna biometrike:
    - i. Letërnjoftim
    - ii. Pasaportë.
  - b. kryetari, pasi verifikon se të dhënat e identitetit të zgjedhësit përputhen me të dhënat në listën e zgjedhësve dhe se zgjedhësi është i njëjtë me personin në dokumentin e identitetit, shënon në listën e zgjedhësve llojin dhe numrin e serisë së dokumentit të identitetit dhe i heq vizë emrit të zgjedhësit në këtë listë;
  - c. zgjedhësi që është pajisur nga KIZ me vendim për të votuar pasi hyn në qendër e paraqet atë tek kryetari i qendrës. Emri i këtij zgjedhësi dhe numri i kartës së identitetit të tij shënohet në një regjistër të veçantë;
  - d. zgjedhësi nënshkruan në listën e zgjedhësve anash emrit të tij;





- e. zgjedhësit, personel i stafit akademik, i jepen për të votuar fletët e votimit për rektor, drejtues të njësisë kryesore, për përgjegjës departamenti/qendër kërkimore shkencore në të cilën bën pjesë si dhe fleta e votimit për anëtarë të personelit akademik në Senatin Akademik;
  - f. zgjedhësit student, i jepen për të votuar fletët e votimit për rektor, për drejtues të njësisë kryesore, për anëtarë në Senatin Akademik përfaqësues i studentëve;
  - g. çdo fletë e votimit vulozet, në pjesën e pasme të saj, me vulën e KZF /KQV -së.
  - h. pasi merr fletët e votimit zgjedhësi hyn në dhomën e fshehtë dhe në fletën e votimit për rektor, për drejtues të njësisë kryesore dhe për drejtues të njësisë bazë, shënon në krah të emrit të kandidatit shkruan shenjen "x"/ "+" ose ndonjë shenjë tjetër që tregon qartë zgjedhjen e bërë prej tij. Shenja duhet të vendoset vetëm në krah të një emri. Në rastin kur për autoritet drejtues konkurrin vetëm një kandidat zgjedhësi voton një nga alternativat e shkruara krahas emrit të kandidatit "Pro" ose "Kundër";
  - i. Në fletën e votimit për anëtarë të Senatit Akademik shënon, në krah të emrave të kandidatëve shenjen "X" / "+". Zgjedhësi duhet të shënoje jo më shumë emra se sa është numri i mandateve në Senatin Akademik që i përkasin njësisë kryesore përkatëse.;
  - j. Pasi bën shënimin në fletën e votimit, i palos fletët në mënyrë që shenja të mos jetë e dukshme, del nga dhoma e fshehtë, i hedh fletët në kutitë përkatëse të votimit dhe largohet nga qendra e votimit;
  - k. Nëse shënimin në fletën e votimit apo në të paktën një nga fletët e votimit bëhet jashtë dhomës së fshehtë, zgjedhësi nuk lejohet të fusë fletën/fletët e votimit në kuti. Kryetari i qendrës e merr këtë fletë votimi, shënon në pjesën e pasme fjalët "E dëmtuar" dhe e fut atë në zarfin "Fletë votimi të dëmtuara". Në këtë rast, zgjedhësit i jepet një fletëvotimi tjetër e të njëjtit lloj dhe rasti mbahet shënim në Librin e Protokollit të Mbledhjeve të KQV -së. Nëse zgjedhësi shënon përsëri në fletën e votimit jashtë dhomës së fshehtë, edhe fleta e dytë e votimit futet në zarfin "Fletëvotimi të dëmtuara" dhe zgjedhësit nuk i jepet më fletëvotimi. Nëse zgjedhësi bën shënim ose e dëmton fletën e votimit pa dashje dhe kërkon një fletëvotimi të dytë, fleta e votimit konsiderohet e dëmtuar dhe futet në zarfin "Fletëvotimi të dëmtuara" dhe zgjedhësit i jepet një fletë votimi të dytë. Rasti mbahet shënim në Librin e Protokollit të Mbledhjeve të KQV -së. Nëse zgjedhësi shënon ose dëmton përsëri pa dashje fletën e dytë të votimit, edhe fleta e dytë e votimit futet në zarfin "Fletëvotimi të dëmtuara" dhe zgjedhësit nuk i jepet më fletëvotimi. Në asnjë rast fletët e votimit të dëmtuara nuk hidhen në kutitë e votimit.
7. Në mjediset e njësive kryesore, ku kryhet procesi i votimit ndalohet rreptësishtë çdo lloj forme fushate zgjedhore për kandidatët konkurrentë.
8. Qendra e votimit organizohet në një mënyrë të tillë që të lehtësojë procesin e votimit dhe të garantojë plotësisht fshehtësinë e votës. Në qendrën e votimit është e ndaluar përdorimi i mjeteve të komunikimit apo regjistrimit nga ana e votuesit. Në qendrën e votimit mund





të qëndrojnë vetëm:


- a. i. anëtarët dhe sekretari i *KZF/KQV-së*;
- b. ii. zgjedhësit që janë duke kryer procedurat e votimit deri në përfundim të tyre;
- c. iii. vëzhguesit e akredituar;
- d. iv. përfaqësuesit e MAS.

### **Neni 36** **Mbyllja e Votimit**

1. Qendrat e votimit mbyllen në orën e caktuar. Nëse edhe pas kalimit të këtij orari ka zgjedhës që presin në radhë, komisioni mbledh dokumentet e identifikimit të të gjithë zgjedhësve të pranishëm dhe i thërret ata me radhë për të kryer votimin. Asnjë zgjedhës tjetër nuk do të lejohet të votojë nëse nuk ka qenë në radhë në kohën e mbledhjes së dokumentit të identifikimit.
2. Pasi voton edhe zgjedhësi i fundit i pranishëm, komisioni merr vendim për mbylljen e votimit, duke plotësuar formularin përkatës, ku shënohet edhe ora e mbylljes së votimit. Pas kësaj, në qendrën e votimit mund të qëndrojnë vetëm anëtarët dhe sekretari i *KZF/KQV-së*, si dhe vëzhguesit e akredituar nga KIZ-i, kandidatët dhe përfaqësuesit e MAS-it.

### **Neni 37** **Veprimet pas Mbylljes së Qendrës së Votimit**

1. Pas marrjes së vendimit për mbylljen e votimit, kryetari së bashku me anëtarët e *KZF/KQV-së* kryejnë, sipas radhës, veprimet e mëposhtme:
2. Kryetari, nën vëzhgimin e të gjithë anëtarëve:
  - a) shënon numrin e zgjedhësve që kanë votuar nga personeli i stafit akademik dhe student, duke numëruar nënshkrimet e bëra në listën përkatëse të zgjedhësve, si dhe atyre që janë në regjistrin e veçantë, që kanë votuar sipas kushteve të parashikuara në këtë rregullore.
  - b) ia deklaron shifrat me zë të lartë anëtarëve të tjerë të Komisionit dhe vëzhguesve të pranishëm;
  - c) i fton ata të verifikojnë shifrat e thëna prej tij;
  - d) urdhëron sekretarin e komisionit të shënojë në procesverbalin për "Mbylljen e votimit" numrin e personave që kanë votuar në qendrën e votimit. Në rast kundërshtimesh për përcaktimin e shifrës, pretendimet shënohen në procesverbal.
3. Kryetari, nën vëzhgimin e të gjithë anëtarëve, pasqyron në procesverbalin për "Mbylljen e votimit" numrin e plotë të fletëve të votimit të qendrës së votimit, për secilin prej kategorive, duke u bazuar tek të dhënat që kanë shoqëruar marrjen në dorëzim të fletëve të votimit nga KIZ, numrin e fletëve të papërdorura dhe numrin e fletëve të dëmtuara për






secilën kategori.

4. Kryetari, nën vëzhgimin e të gjithë anëtarëve të komisionit, fillon numërimin e fletëve të votimit të papërdorura për secilin prej kategorive dhe në përfundim të numërimit i'a bën të ditur shifrat anëtarëve të komisionit. Nëse kërkohet nga një anëtar i komisionit ose ndonjë nga vëzhguesit, kryetari është i detyruar të rifillojë edhe një herë numërimin e fletëve të votimit të papërdorura. Në përfundim të numërimit, fletët e votimit të papërdorura mbyllën në zarfin ku është shënuar "Fletëvotimi të papërdorura" për secilën kategori. Numri fletëve të votimit të papërdorura pasqyrohet në procesverbalin për "Mbylljen e votimit".
5. Kryetari, nën vëzhgimin e të gjithë anëtarëve të komisionit, numëron fletët e votimit të dëmtuara që gjenden në zarfin "Fletëvotimi të dëmtuara" për secilën kategori. Numri i fletëve të votimit të dëmtuara pasqyrohet në procesverbalin për "Mbylljen e votimit".
6. Në përfundim të veprimeve të parashikuara në pikat 1 deri në 4 të këtij neni, futen:
  - a) në kutinë e materialeve zgjedhore për zgjedhjen e rektorit:
    - i) zarfi "Fletëvotimi të papërdorura për zgjedhjen e rektorit";
    - ii) zarfi "Fletëvotimi të dëmtuara për zgjedhjen e rektorit";
    - iii) Procesverbalin për numrin e fletëve të votimit gjithsej, numrin e fletëve të papërdorura dhe numrin e fletëve të dëmtuara.
  - b) Për secilën kategori veprohet në të njëjtën mënyrë.
7. Mbyllet kutia e votimit. Elementët e sigurisë për mbylljen e këtyre kutive shënohen në procesverbal.
8. Kutia e votimit dhe kutia e materialeve zgjedhore përkatëse dërgohet në KIZ brenda 24 orëve nga mbyllja e procesit të votimit. Kutitë shoqërohen nga dy anëtarë të KZF -së dhe mund të shoqërohen nga vëzhguesit e kandidatëve dhe përfaqësues të MARS-it.
9. Në rastin kur në njësinë kryesore votimi është kryer në më shumë se një qendër votimi, komisioni i qendrës së votimit pas administrimit të materialeve zgjedhore sipas rregullave të përcaktuara në këtë nen, i dorëzon ato së bashku me kutinë e votimit për rektor në KZF, e cila është përgjegjëse për transportin e tyre në KIZ.

### Neni 38

#### Procedurat e Vlerësimit

1. Procedurat për vlerësimin, numërimin dhe nxjerrjen e rezultatit për zgjedhjen e rektorit, autoritetet drejtues në njësitë kryesore, autoritetit drejtues në njësitë bazë, për anëtarë në Senatin Akademik dhe për anëtarë në Komisionet e përhershme në njësitë kryesore kryhen prej KZF -së, në një sallë të caktuar prej saj dhe që ndodhet në mjediset e njësisë kryesore.
2. Në rastin kur procesi i votimit është kryer në më shumë se një qendër votimi në njësinë kryesore, Komisioni i qendrës së votimit, pasi ka përfunduar administrimin e materialeve zgjedhore sipas kërkesave të kësaj rregulloreje, i dorëzon ato në sallën e numërimit të votave, KZF-së. Dorëzimi i materialeve zgjedhore dhe i kutive të votimit bëhet me





procesverbal.

3. Vlerësimi, numërimi i votave dhe nxjerrja e rezultateve zhvillohet sipas radhës së mëposhtme:
  - a) Rektor;
  - b) Drejtues i njësisë kryesore
  - c) Drejtuesi i njësisë bazë /qendrës së kërkimit shkencor
  - d) Anëtarë të Senatit Akademik (personel akademik dhe studentë)
  - e) Anëtarë të Komisioneve të përhershme në njësitë kryesore (personel akademik dhe studentë),
4. Kryetari hap kutinë e votave për rektor, nxjerr nga kutia fletët e votimit, i shpalos dhe i vendos mbi tryezë me pjesën e pasme të fletës nga ana e sipërme. Pas kësaj:
  - a) vlerëson të gjitha votat e gjetura në kuti, duke ia treguar të gjithë anëtarëve të komisionit dhe vëzhguesve. Votat e pavlefshme ndahen në një grup të veçantë
  - b) numëron votat e vlefshme dhe votat e pavlefshme. Numri i tyre, së bashku me numrin e përgjithshëm të votave të gjetura në kuti shënohen në procesverbal.
  - c) verifikon numrin e përgjithshëm të votave të gjetura në kuti me numrin e votave që duhet të ishin në kuti në bazë të dhënave të procesverbalit të KZF/KQV-së, për numrin e përgjithshëm të fletëve të votimit, fletët e votimit të papërdorura dhe fletët e votimit të dëmtuara. Rezultati shënohet në procesverbal.
  - d) ndan në grupe të veçanta votat e hedhura nga personeli akademik dhe nga studentët dhe i numëron votat e secilit grup. Numri i tyre shënohet në procesverbal.
  - e) ndan votat e personelit akademik në grupe sipas emrit të kandidatit dhe i numëron. Votat e gjetura shënohen në procesverbal.
  - f) ndan votat e studentëve në grupe sipas emrit të kandidatit dhe i numëron. Votat e gjetura shënohen në procesverbal.
  - g) harton tabelën përfundimtare për votimin në njësinë kryesore përkatëse dhe e miraton me vendim.
5. Vota të pavlefshme janë fletët e votimit kur:
  - a) fleta e votimit nuk ka të njëjtën madhësi, ngjyrë ose formë me fletën e votimit të miratuar nga KIZ;
  - b) fletës së votimit i mungojnë vulat e parashikuara në këtë rregullore;
  - c) në fletën e votimit janë bërë shënime apo shenja që bëjnë të pamundur vlerësimin e votës;
  - d) në fletën e votimit janë bërë shënime në favor ose në disfavor të subjekteve të caktuara zgjedhore;
  - e) është votuar për më shumë ose më pak subjekte zgjedhore sesa ato të parashikuara në fletën e votimit;
  - f) nuk është votuar për asnjë nga subjektet zgjedhore në fletën e votimit;
  - g) nuk është e qartë se për kë është votuar ose zgjedhësi ka votuar për një person apo subjekt që nuk është në fletën e votimit.





6. Në rast se në njësinë kryesore është votuar në më shumë se një qendër votimi, KZF vlerëson dhe numëron votat për secilën qendër votimi sipas procedurës së përshkruar më sipër.
7. Pas përfundimit të vlerësimit dhe numërimit të votave për rektor, KZF harton tabelën e rezultatit të votave për rektor. Kopje e tabelës të rezultatit të votave për rektor u jepet, sipas kërkesës, vëzhguesve, kandidatëve dhe përfaqësuesve të MAS.
8. Në rastin kur nuk ka asnjë fitues, KIZ, në përputhje me përcaktimet e kësaj rregulloreje, merr vendim për organizimin dhe zhvillimin e raundit të dytë të zgjedhjeve.
9. KZF vazhdon procesin e vlerësimit dhe numërimit të votave për drejtues të njësisë kryesore, drejtues të njësisë bazë, për anëtarët e Senatit Akademik dhe Komisioneve të përhershme duke ndjekur për aq sa është e nevojshme procedurën e përshkruar në këtë nen.
10. Pas përfundimit të vlerësimit dhe numërimit të votave, KZF harton tabelën përfundimtare të rezultateve të votimit dhe shpall me vendim të veçantë, rezultatet për secilën kategori. Tabela përfundimtare dhe vendimi i KZF-së, nënshkruhen nga të gjithë anëtarët duke deklaruar votën "pro" apo "kundër" dhe vulosen nga sekretari. Kopje të tabelës përfundimtare të rezultatit të zgjedhjeve ju jepet sipas kërkesës, vëzhguesve të kandidatëve.
11. Mënyra e përllogaritjes së votave për autoritetet drejtuese për të cilët votojnë dhe studentët, do të jetë:
  - $R\% = A/N1 * 90\% + B/N2 * 10\%$
  - R% - është rezultati i shprehur në përqindje i një kandidati për një pozicion të caktuar;
  - A - është numri i votave pro kandidatit nga personeli akademik;
  - N1 - është numri i përgjithshëm i votave të vlefshme nga personeli akademik;
  - B - është numri i votave pro kandidatit nga studentët;
  - N2 - është numri i përgjithshëm i votave të vlefshme nga studentët,
12. Vendimet e KZF për tabelat e rezultateve të zgjedhjeve ankimohen në KIZ.
13. Gjatë procesit të vlerësimit dhe numërimit të votave në vendin e numërimit të votave kanë të drejtë të qëndrojnë anëtarët dhe sekretari i KZF -së, kandidatët dhe vëzhguesit e tyre të akredituar dhe përfaqësuesit e MAS-it.
14. Çdo kontestim i kandidatëve apo vëzhguesve të tyre, shënohet detyrimisht në librin e procesverbaleve nga sekretari i KZF-së.

### **Neni 39** **Ankimet**

1. Çdo kandidat pjesëmarrës në zgjedhjet për autoritete drejtuese ose anëtar në Senatin Akademik ka të drejtë të ankimohet në KIZ kundër vendimeve të KZF -së që cenojnë interesat e tij, brenda 2(dy) ditëve, kalendarike, nga data e shpalljes së vendimit.
2. Kundër vendimeve të KZF -së për shpalljen e tabelave të rezultatit, tabelave përmbledhëse të rezultatit dhe rezultatit të zgjedhjeve, ankimimin bëhet në KIZ jo më vonë se 2(dy) ditë kalendarike, nga data e shpalljes së tyre.





3. Për efekt të llogaritjes së afatit, periudha dy ditore fillon në orën 16.00 të ditës së shpalljes së aktit për të cilin bëhet ankimimi dhe përfundon në orën 16.00, pas dy ditëve kalendarike.
4. KIZ administrojnë dhe marrin vendim për ankimimet për çështje që nuk lidhen me rezultatin e zgjedhjeve jo më vonë se 24 orë pas paraqitjes së tyre.
5. KIZ administrojnë dhe marrin vendime për ankimimet për rezultatin e zgjedhjeve jo më vonë se 48 orë pas paraqitjes së tyre.
6. Çdo vendim i KIZ është i ankimueshëm në Komisionin e Apelit, brenda 5 ditëve nga dita e shpalljes së vendimit. Komisioni i Apelit shprehet me vendim të arsyetuar brenda 5 ditëve kalendarike.

#### Neni 40

#### Ankimi në Komisionin e Apelit

1. Komisioni i Apelit përbëhet nga 3 (tre) anëtarë. Ata përzgjidhen nga Senati Akademik i UBT-së.
2. Për formimin e tij, Senati Akademik i UBT-së, pas shpalljes së ditës së zgjedhjeve prej Ministrisë së Arsimit, publikon kërkesën për aplikim për anëtar në Komisionin e Apelit të institucionit, në një ditë me atë të KIZ-it. Të drejtën për të aplikuar e kanë individët që:
  - a. Kanë përvojë pune në mësimdhënie, jo më pak se 5 (pesë) vjet, me kohë të plotë;
  - b. Nuk kanë qenë asnjëherë të dënuar për vepra penale me vendim të formës së prerë;
  - c. Nuk kanë lidhje gjinore në vijë të drejtë ose të tërthortë, deri në shkallë të katërt, me kandidatë që konkurrojnë në zgjedhje. Në rast konstatimi të tillë, anëtari dorëhiqet menjëherë dhe zëvendësohet nga Senati Akademik me short.
3. Komisioni i zgjedhur i Apelit, në mbledhjen e parë zgjedh Kryetarin dhe Sekretarin e tij, me shumicën e thjeshtë të votave. Komisioni i Apelit i ushtron funksionet e tij për një mandat 4-vjeçar.
4. Rregullat për mënyrën e funksionimit të Komisionit të Apelit hartohen dhe vendosen prej këtij komisioni, menjëherë pas konstituimit të tij dhe zgjedhjes së kryetarit dhe sekretarit.
5. Anëtarët e Komisionit të Apelit shpërblehen për punën që bëjnë. Masa dhe mënyra e shpërblimit të tyre caktohet me vendim të Bordit të Administrimit UBT-së.
6. Komisioni i Apelit shqyrton dhe marrin vendim të arsyetuar, në të cilin përfshihen dhe mendimet "kundër", për çdo ankim për vendime të marra prej KIZ;
7. Vendimi i Komisionit të Apelit është i formës së prerë, përfundimtar, i detyruar për t'u zbatuar.
8. Kundër vendimeve të komisionit të apelit, bëhet ankim në rrugë gjyqësore nga pala që ka interes të ligjshëm.





**Neni 41**  
**Pavlefshmëria e Zgjedhjeve**

1. KIZ, kryesisht ose me kërkesë të kandidatëve, i shpall zgjedhjet të pavlefshme në një ose më shumë njësi kryesore, në rast se:
  - a) kanë ndodhur shkelje të ligjit;
  - b) mund të ketë cenuar procesin zgjedhor në një masë të tillë, që mund të ketë ndikuar në fitimin e mandateve;
  - c) kanë ndodhur fatkeqësi natyrore në përmasa të tilla, që kanë penguar pjesëmarrjen e zgjedhësve në votim;
  - d) votimi nuk ka filluar apo është pezulluar për më shumë se pesë orë.
2. Kërkesën për pavlefshmëri të zgjedhjeve kërkuesi duhet ta shoqërojë me shpjegimin për shkaqet ligjore ku mbështetet kërkesa, përshkrimin e shkeljeve të pretenduara dhe arsyetimin e detajuar të tyre për pasojat që kanë prodhuar.
3. Shqyrtimi i kërkesës për pavlefshmëri të zgjedhjeve dhe vendimmarrja për kërkesën, bëhet nga KIZ, jo më vonë se 2(dy) ditë kalendarike nga depozitimi i saj. Vendimi i KIZ-it është i ankimueshëm në Komisionin e Apelimit, sipas parashikimeve të kësaj rregulloreje.
4. Pas vendimit për pavlefshmëri të zgjedhjeve, shpallen zgjedhje të reja sipas përcaktimeve të ligjit nr. 80/2015 "Për Arsimin e Lartë dhe Kërkimin Shkencor në institucionet e arsimit të lartë në Republikën e Shqipërisë" dhe kësaj rregulloreje.

**Neni 42**  
**Dispozita të Fundit**

1. Me përfundimin e procesit të shqyrtimit të ankimimeve në Komisionin e Apelimit, KIZ shpall rezultatet përfundimtare të zgjedhjeve për autoritete drejtuese dhe Senatit Akademik të UBT-së, si dhe kategoritë e tjera sipas përcaktimeve të kësaj rregulloreje.
2. KIZ i përcjell ministrit të Arsimit, vendimin për shpalljen e fituesit rektor të UBT-së. Ministri i Arsimit, pas verifikimit të ligjshmërisë së procesit zgjedhor, i përcjell presidentit të Republikës vendimin e KIZ për shpalljen e fituesit rektor të UBT.
3. Data e thirrjes së mbledhjes së parë të Senatit Akademik të UBT-së mbahet brenda 15 ditëve nga data e dekretimit të Rektorit nga Presidenti i Republikës. Kjo datë shënon edhe shfuqizimin e Senatit të mëparshëm dhe fillimin e punës së Senatit të ri.
4. Rektori i zgjedhur dhe dekretuar, emëron drejtuesit e zgjedhur të njësive kryesore të UBT-së, brenda muajit të parë të dekretimit të tij.
5. Dekani/Drejtori i zgjedhur i njësisë kryesore emëron drejtuesit e zgjedhur të njësive bazë/qendrave të kërkimit shkencor, brenda muajit të parë të emërimit të tij.
6. I gjithë dokumentacioni zgjedhor ruhet në arshivën e institucionit, në bazë të rregullave të përcaktuara në kuadrin ligjor për administrimin, ruajtjen dhe arkivimin e dokumentacionit.
7. Monitorimi i procesit zgjedhor në të gjithë komisionet zgjedhore apo qendrat e votimit,



realizohet nga vëzhguesit e akredituar të kandidatëve, kandidatët dhe përfaqësuesit e MAS.

8. Kjo rregullore është e detyrueshme për t'u zbatuar si e tillë nga të gjitha njësitë kryesore dhe filialet e UBT-së.
9. Kjo rregullore hyn në fuqi menjëherë pas miratimit të saj nga Senati Akademik i UBT-së.

